



UNIVERSITÄTS-
BIBLIOTHEK
PADERBORN

Universitätsbibliothek Paderborn

Annus Cisterciensis

In quo Pia, Et Brevi Apostrophe proponuntur Veneranda, & Imitanda Gesta
præcipua, & eximiæ Virtutes Sanctorum ac Beatorum utriusque sexûs
Ejusdem Sacri, Et Ab Origine Sua Exempti Ordinis

Meglinger, Joseph

[S.l.], Anno MDCLXXXII.

Anni Cisterciensis Januarius.

urn:nbn:de:hbz:466:1-45295



ANNI
CISTERCIENSIS
JANUARIUS.

I Januarij. Calende.



EATE BERNARDE;
primū Fōtaneti Ab-
bas; dein totius sacri
Ordinis Cisterciensis
Caput, ac Prēsul piissi-
me: qui fragrantissimū

*Generā
lis XII.*

*Obijt
anno
1184.*

virtutum tuarum odorem per omnem
latē Galliam Italiāmq; diffudisti; dum
Romam difficili labore profectus, cur-
sum errorum, quorum reus agebatur
magni cateroquin nominis, Joachīm
Abbas Curatij, tua auctoritate & do-
ctrina gloriosē stitisti. Breve tandem
mortale regimen, ut longiūs produce-
res, regno eterno, pijs operibus plenus
permutasti: eundem sepulchri hono-
rem cum primis Cistercij Patribus, Ste-
phano & Alberico nactus, quōd illis
te non imparem fecerit vitę sanctitas,

A

&

2 ANNI CISTERCIENSIS

Felix
anni in
itium

& patrata miracula. Ora pro me, & impetra mihi à dulcissimo JESU auspiciatum hujus anni principium; ut sicut ille hac die pro me misero peccatore effudit sacratissimas Sanguinis sui primitias; ita ego non solum hujus anni, sed omnium dierum meorum primas cogitationes, & affectus cordis, illi unice consecrem: atque in hoc pio proposito usque ad finem vite perseverem.

Floruit
circa
annum
1185.

B. ULRICE, ex Valcellensi Cœnobio assumpte Antistes Villarij: qui ætate, & vivendi austeritate fractus corpore, at non animo, prædecessorum propagaturus ad posteros exemplum; Liã negotiosã relicta, in sacra solitudinis quiete, id est, inter cœlestis Rachelis amplexus clarã sanctitatis opinione inortem oppetiisti. *Docce me Liam, id est, malè oculatas hujus mundi vanitates ita aversari; ut Rachelem, pulcherrima cœligaudia, hic devotis desiderijs concupiscam & post mortem æternã possessione amplectar.*

Vixit
anno
1230.

B. JOANNES Corneliensis cœnobij Prior, qui pias illius Parthenonis, noviter tunc conditi, Virgines, candida animi simplicitate inter multas tribulationes rexisti: ac S. Julianæ orationibus adjutus, multa præclare de sanctissimo Eucharistiæ Sacramento scripsisti: & denique eãdam præfagiente, vitæ

vitæ hujus miserias pretiosæ mortis
transitu terminâsti. *Roga DEUM, ut
accendat frigidissimum cor meum amore
pretiosissimi Mysterij: præserim, ut pere-* Evcha-
grinationis meæ finem, ad animæ meæ so- ristia.
*latium & in futura beatitudinis pignus,
Angelico hoc Viatico clementer præmuniat.*

B. PETRE de Armentera Abbas, *Obijt*
singularis MARIÆ Deiparæ cultor; *anno*
quam usq; ad decrepitam senectutem 1167.

omni devotionis genere honorâsti;
constructa etiam sanctissimo ejus no-
mini eleganti Basilicâ. *Exora Amabi-*
lissimam pietatis Matrem ut dignetur
hunc noviter exorientem annum mecum
candidis ominibus auspiciari. Ipsa lucidissi-

ma MARIS-STELLA regat prosperè Maria
hunc duodecim mensium cursum. *Ipsa sit* anni
cogitationum mearum frequens materia; Cynosu-
ra.
omnia actionum præses, & Cynosura.
Ipsa me deducat ad felicem anni, aut si sic
Deo placuerit, vitæ finem.

S. BERNARDUS, ser. 3. de Circumc.

Hoc est nempe salvationis nostræ prin- Signa
cipium; cum incipimus respuere, quæ conver-
diligebamus; dolere, unde letabamur sionis.
amplecti, quod timebamus; sequi,
quod fugiebamus; optare, quod con-
temnebamus.

4 ANNI CISTERCIENSIS

) (SS) (SS) (SS) (SS) (SS) (SS) (SS)

2 Januarij. 4 Nonas.

Obijt
anno
1216.

Honor
contem-
ptus se-
quitur
contem-
ptorem.

Humi-
litas.

B. HENRICE, qui jam in ætate in-
fima pietatis summæ specimina,
exinde autem insoliti fervoris tyro in
Claravalle, ea virtutum insignia osten-
disti, ut juvenis Altæ Cumbæ Abbas
designatus, post pijsimum illius mo-
nasterij regimen, Claramvallem acce-
peris gubernandam. Supremam por-
rò Ordinis, ac Tolosanæ Ecclesiæ ca-
thedram conscendere jussus, utramq;
verè humilitatis sectator abnuisti. Fu-
gisti honores, non effugisti. Quantum-
cunque enim invitus Cardinalis Epi-
scopus Albanensis creatus, Crucis
vexillum contra Christiani nominis
hostes circumtulisti. In Petri denique
Sede collocandus, pari demissione &
sublimitate animi consentire noluisti:
gravissimos interea labores pro Eccle-
siæ communi bono, in Fidei & Pacis
hostes per varias Legationes suscipi-
ens. In quibus Atrebatî coram Ara D.
Andrææ orans, pijsimè obdormivisti.
*O magnanime, & peritissime humilitatis
magister! in eandem me duc scholarum, &
doce me id amare, quod, ut Deo placerem,
sponie elegi; nimirum abjectus esse in Do-
mo Domini.*

B. ALAR-

B. ALARDE, strenue quondam miles in sæculo; quo spreto, in Luka monachum induens, diuturnum, & gravissimum morbum in summa mentis tranquillitate tolerasti; ita ut vermes ex ulceribus tuis scaturientes pro delicijs haberes. Et delicias etiam tuas fuisse patientiam tuam, ostendit summus patientiæ doctor & remunerator Christus; qui & de instante mortis hora te edocuit; & splendido comitatu cœli civium stipatus, animam tuam ad sidera deduxit: mutato quammoxfœtore ulcerum in odores longè amenissimos. *Instrue meum pati refugientem animum, & quam tu tot annis inter cruciatus continuos possedisti patientiam, mihi vel in levibus molestijs (quæ nunquam desunt) perferendis impetra. Eundem ora; ut gratiam mihi concedat, qua exulcerata conscientia vermem rastro penitentia exturbem: idque ante fatalem illam horam, qua periculosissimè cor emoriens lacerare solent.*

*Obijt
anno
1216.*

*Patiē-
tia in
morbis.*

*Patiē-
tia,*

S. BERNARDUS, ser. I. de Circūcis.

A planta pedis usq; ad verticem non est in nobis sanitas: nec est aliqua pars, quæ non sit tabida hoc veneno. Propterea sicut parvulus adhuc in fide & di-

6 ANNI CISTERCIENSIS

Circū-
cificio
duplex.

lectione, congruum sibi mandatū exigua circumcissionis accepit: sic ubi crevit in virum perfectiorem, toto jubetur corpore baptizari; quæ est totius hominis circumcisio.

(☩)(☩)(☩)(☩)(☩)(☩)(☩)(☩)

3 Januarij. 3 Nonas.

Floruit
anno
1300.

B. HOSTRADE, simplicitate animi, & quæ illam comitari solet, vitæ innocentiam admirande: qui à teneris spreta mundi vanitate, inter Cœnobitas Cistercienses degebas. Pater monasterio præpositus, in id potissimas curas intendisti, ut filios haberes tui similes, id est pios ac sanctos. Jamque meritum Cœli Regina suaviter à frugali mensa ad æternas epulas invitavit; gestatum brachijs puerum JESUM tibi amplectendum tradens. Cui cum de pauperulis cibus quidpiam offerres, aliud ille convivium in domo Patris sui tibi intrà triduum promisit. Inter illas epulas jam felix, mei tanquam famelici mendici memor, de divite gratiarum celestium mensa micæ aliquas mihi largire. Nosti extremam egestatem animæ meæ: ad quam si Divinus ille hospes tuus diverteret, nihil de virtutum penu haberet in promptu, quod dilecto apponeret.

Felix
cōviva.

Pauper-
tas ani-
mæ.

B. Go-

B. GODEFRIDE à S. Mauro, sa-
 cri Ordinis Cisterciensis in Congrega-
 tione Fuliensi monache: qui tenerum
 corpus diris verberibus discerpendo se-
 pe totus sanguine madebas. Nunquam
 ad sacrosanctum Missæ Sacrificium ac-
 cedebas; nisi prius per solidæ horæ spa-
 tium Dominicæ Passionis mysteria in-
 ter lachrymarum imbres fuisses con-
 templatus. Ægrotis, præsertim morti
 proximis, indefessa charitate, per sua-
 via, & amore Divino inflammata al-
 loquia, subvenire gaudebas. Denique
 hujusmodi laborum, & aliorum cruci-
 atuum asperitas infirmi corporis vin-
 cula dissolvit; à quibus anima libera,
 ad libertatem æternam evolavit. *Ab
 quoties aridus & siccus accedo ad SS. My-
 steria! Tu, quæso, ex lachrymarum illa-
 rum, quæ olim ex oculis tuis manarunt,
 felicissimo flumine, guttam in saxum cor-
 meum immitte.: emolliet illud & purgabit,
 ut dignius deinceps receptaculum tam im-
 mense thesauri fiat.*

*Obijt
 anno
 1611.*

*Pia præ-
 paratio
 ad Mis-
 sam.*

*Eucha-
 ristix
 digna
 sūptio.*

B. OZILIA, S Julianæ Cornelien-
 sis individua comes: cum qua diutur-
 nas persecutiones, longumque exilium
 perpessa; invicto animo perseverans;
 geminum tandem exilium feliciore
 patriâ permutasti. *Utinam & ego hujus
 terreni exilij brevitatem saepe & serio cum*

*Vixit
 circ. añ.
 1240.*



8 ANNI CISTERCIENSIS

Vita
brevis,
æterni-
tas lon-
ga.

*cælestis patriæ infinita æternitate confer-
rem! & exinde discerem hujus vite mo-
mentaneas misérias forti hilarique ani-
mo perferre: utpote quas exceptura sunt ea
gaudia, digna, pro quibus mille mundi,
cum suis vanitatibus contemnantur.*

S. BERNARDUS, *serm. i. de divers.*

Momentaneum hoc, & leve tri-
bulationis nostræ: &c. [2. Corint.

Adhor-
tatio ad
patien-
tiam

4.] *Perge ergo murmurare, & dice-
re: Longum est, grave est; non possum
tam immania, & diuturna portare.*

*Apostolus momentaneum & leve per-
hibet esse, quod tolerat. Et certè nec-
dum à Judæis quinquies quadragenas
unâ minus accepisti; necdum nocte ac
die in profundo maris fuisti; necdum
plus omnibus laborasti: postremò nec-
dum usque ad sanguinem recepisti.
Vide ergo, quàm non sine condignâ
ad gloriam passiones.*



4 Jann-

☉)(☉)(☉)(☉)(☉)(☉)(☉)

4 Januarij. Pridie Nonas.

B. GUILIELME Walchæ, à prima juventute sub Cisterciensium disciplina fideliter educate, & ob insignes virtutes ad Episcopatum Midensem promote. In quo cum orthodoxæ Fidei veritatem contra novatores strenuè propugnares; jussu impiæ reginæ Elisabethæ in tetrum carcerem detrusus; tredecim annorū erumnas patientiâ planè invictâ superasti. Deniq; publicâ sententiâ proscriptus, sed ob devoratos carceris squalores nunquam non languidus, Compluti in Hispania miserijs & vitæ metam posuisti, non sinè celebri sanctitatis fama: cujus testem habuisti virum doctrinâ & pietate clarissimum, quo ad postremam exomologesin utebaris. Is enim constanter de te afferavit; nullam letalem noxam toto vitæ tempore à te fuisse commissam. *O immensum cum tali conscientia morientis solatium! Ora, ut Clementissimus Deus delicta juventutis mee post tergum suum proiciat: ego autem ab hac hora usque ad vitæ finem nunquam deliberatè in peccatum consentiam.*

Obijt
anno
1577.

Longū
marty-
rium.

Innocē-
tia ra-
ra.

Lata
morscū
cōsciēti
a pura.

B. CISINANDE, Melliflui BER-
NARDI alumne; & illi ob vitæ puri-
tatem

Vixit
circa a.

10 ANNI CISTERCIENSIS

1160.

tatem singulariter dilecte. A quo in Hispanias missus, multum laboris & sudoris in exstructione monasterij S. Joannis de Tarouca pertulisti: nec ab indefesso studio amplificandi Ordinis cessasti; donec te beata mors de labore ad requiem evocaverit. *Non possum Deo non placere, si Bernardo placuero. Tu igitur impetra mihi à Deo virtutes illas, quas melleus amator adeo tenerè in te dilexit. Scis, illa charismata non esse mea- rum virium, sed Divinæ clementiæ dona; certius non impetranda, quàm amicorum Dei suffragijs.*

Virtutes sunt do-
na DEI,

Obijt
anno
1560.

Studiū
humili-
tatis.

B. ELISABETH, sanctimonialis Vallis-Rosarum, animi demissione, & patiendi ardore celeberrima: quæ scommata & diæteria promptiori ac pacati-ori animo non solum excepisti, sed & expetijsti, quàm alij laudes. Vilissima etiam exercitia studiosè ambiebas: notu enim ancillarum munia occupans, vasa & supellectilem monasterij mundabas, ut interdiu sinè interruptione Divinis rebus vacares. Sicque prudens virgo, bonorum operum lampade ornata; & oleo gratiarum abundans, ad cœlestes amati Sponsi nuptias es admissa: Angelis ad exequias lætum tibi epithalamium accinentibus. *Deprecare pro me Electum ex millibus Sponsum tu- um*

um, ut animam meam, quam arrhâ pre-
tiosissimi Sanguinis sui sibi copularit in
sponsam, seruet à nœvis, qui purissimis ejus
oculis displicent, immaculatam.

S. BERNARDUS, serm. 7. in Cant.

Anima, quæ diligit Deum, sponsa
vocatur: hæc enim duo nomina sponsa
& sponsus, maximè indicant internos
affectus: his enim omnia communia
sunt: una hereditas, una domus, una
mensa, unus lectus, una caro. O quan-
ta amoris vis, quanta in spiritu liber-
tatis fiducia!

Anima
amans
sponsa
Christi

(☩)(☩)(☩)(☩)(☩)(☩)(☩)

5 Januarij. Nonis.

BIDA, Argensolij Abbatissa: quæ
pijssimè tum à parentibus, cum à
sanctimonialibus Ordinis S. Benedicti
educata, sacras ædes jam infans avidè
frequentabas. teneri corpusculi mem-
bra ictibus flagelli, vix obtentis per æ-
tatem ad talia viribus, lacerare; per hi-
emem humo affixa, noctes orando tra-
ducere; plurimos dies pane & aqua vi-
ctitare solebas. Cùm autem hic vitæ
rigor graves tibi morbos generaret, e-
os, ut gratissima patientiæ exercita-

Floruit
circa
annum
1224.
Matu-
ra ante
ætatem
virtus.

A 6 menta

12 ANNI CISTERCIENSIS

*In mor-
bis, cœ-
lesti fa-
vore re-
creatur*

*animas
in pur-
gatorio
juvat.*

mēta, invictâ spiritûs fortitudine tole-
rabas. Altioris perfectionis avida ex
educationis tuæ monasterio ad Cister-
cienses transiisti: ubi diuturna paraly-
si decumbens, prodigio subitaneo, dum
festivus D. Leonardo dies ageretur, in-
tegrè convaluisti. Alijs deinde morbis,
ad meriti augmentum, bis terq; affli-
cta, multos per id tempus cœli favores
experiebaris: divina luce ita mentem
tuam accendente, ut nullius te cordis
arcana laterent. Ex cujus scientiæ fon-
te quibusdam solatia, alijs objurgatio-
nes distribuebas. Neq; pietatem tuam
intra hujus orbis terminos conclude-
bas; quin & animas in flammis piacu-
laribus gementes juvares: quas tuis o-
rationibus in libertatem assertas, fre-
quenter tibi gratias agentes aspexisti:
utî etiam cœlestes Genios, pulcherri-
ma specie tibi apparentes. Dum Chri-
sti Servatoris arma, Passionem ejus re-
præsentantia, contemplatione peniti-
ore revolvebas, tota in lachrymas sol-
vebaris. Unde majestati Divinæ tam
eras accepta; ut nullius unquam peti-
tionis repulsam tuleris. Venerabatur
sanctimoniam tuam præ ceteris Comi-
tissa Campaniæ Blanca: quamobrem
cœnobium ex Voto à se constructum
in tui favorem Cisterciensibus assigna-
vit

vit, & tuæ prudentiæ regendum com-
 misit: magno quidem suo emolumen-
 to; utpote ab hoste infensissimo statim
 libera, ac per te à repentina morte ser-
 vata. Cùm enim aliquando consuetae *mortem*
 per noctem orationi invigilares, An- *sustinet*
 gelum vidisti Comitissæ cervici ferali *pro be-*
 ictu gladij minitantem: tu verò te me- *nefa-*
 diam statuens, lacrymis impetraſti, ut *ctrice.*
 illi furor Domini parceret, darétque
 pœnitentiæ locum; & strictum ferrum
 in te converteret: gaudentem; quòd a-
 nimam tuam pro Benefactrice ponendo,
 summum Christianæ charitatis fa-
 stigium attingeres; simulque impleret-
 tur ardens desiderium, cupientis dis-
 solvi, & esse cum Christo. Caterùm
 durante regimine cùm dæmon qua-
 dam nocte subditas tibi virgines tam *demonē*
 profundo somno versisset, ut præter *cogit, ut*
 te solam nulla ad cantandas matuti- *se vidē-*
 nas DEO laudes compareret: insultan- *dū præ-*
 tem, sedēq; cachinnantem malignum *beat.*
 coëgisti; ut iisdem gestibus omnium se
 oculis conspicuum exhiberet. Quo in-
 jucundo spectaculo, facile est cogitare,
 quàm vigiles deinceps effeceris. Non
 cessat etiamnum vaferrimus hostis laudes *Vigilā-*
 Divinas suis fraudibus impedire. Tu exci- *tia in*
 ta me, & juva; ut ejus technas alacri vi- *Dei lau-*
 gilantiæ & devotione ad nihilum redigam. *de*

14 ANNI CISTERCIENSIS

Obijt
anno
1240.

Hereses
oppu-
gna:

Obedi-
entia.

B. ALACHRINE, in Casemario
disciplinis monasticis imbutus: qui pie-
tate & scientiâ adeo nominatus eras;
ut te Christi Vicarius Romam accersitum,
hæresi tunc nascenti publica au-
toritate opposuerit. Tu verò spiritu
Apostolico igneus, velut alter Elias, in
ore gladij, quod est Verbum DEI, non
sinè magno Catholicæ veritatis incre-
mento heterodoxos oppressisti. Ad so-
lium Episcopale euectus, missusque A-
postolici Legati titulo in Teutonium;
Bononiæ magnum sui Ordinis Patri-
archam Dominicum invisisti. Ubi ju-
cundum mutuæ humilitatis certamen
spectari poterat: dum uterq; in alterius
sanctitate cum admiratione defixus,
DEI in se dona, ipsa occultatione ma-
nifestabat. Peractis feliciter Nuncia-
turæ negotijs, post viginti annorum
in Pontificia sede regimen, ad beato-
rum in cœlo sedes conscendisti. *Doce me
vocationi meæ ita respondere, ut præter id,
quod sacra disponit obedientia, nihil quæ-
ram, nihil admittam, certus, me feliciore
sub umbra nō victurum, quàm obedientiæ.*

S. BERNARDUS, ser. 3. de Circumc.
*Non dedignandum est servo, quod
præcessit in Domino: siquidem non est
servus*

servus major Domino suo. Ille enim cum jam crevisset atate, sapientiâ, & gratiâ apud Deum & homines: cum jam duodecim annorum esset, & remansisset in Jerusalem, inventus à B. Virgine & Joseph, cuius filius putabatur, in medio Doctorum... Tamen descendit cum illis, & erat subditus illis. Et tu ergo subditus esto propter illum.

Obedientiam suo exemplo docet Salvator.

☩)(☩)(☩)(☩)(☩)(☩)(☩)

6 Januarij. 8 Idus

SEDILWALDE Episcopo: qui Cistercij legibus in Meilrosa collum subjiciens, tantum profecisti; ut tuis meritis ita exigentibus, ad Insulas Lindisfarniæ sublimari merueris. Ubi populum tibi commissum exemplo, & doctrina fideliter instruxisti. *Fac, ut & ego fideliter agam in ijs, quæ sunt statûs mei: atque ut mihi creditum Vocationis talentum Domino cum lucro meritorum restituam.*

Floruit
Circa
annum
1300.

B. DIDACE, Oxomensis Episcopo: qui secretioris & sanctioris vitæ instituendæ desiderio, unâ cum D. Dominico Romam petijsti, ut honoris sarcinam

Obijt
anno
1207.

nam

16 ANNI CISTERCIENSIS

nam deponeres: sed voti non factus
 compos, in Archicœnobio Cisterciens-
 si habitu sacri Ordinis assumpto, per
Hereti- aspera viarum pedibus nudis iter faci-
cos con- ens, te totum animarum lucro contra
vertit. Albigenſium errores impendiſti. Ad
 ſolum ſolumque proprium reverſus;
 Cisterciensẽ monachum tam humi-
 liter, quàm laudabiliter populi Paſto-
 rem egisti. Sanctimoniam tuam tam
 in vita; quàm post obitum miracula
 comprobaunt. *Dona me ſancto illo tuo*
fervore, promovenda tam meæ anime ſa-
lutis, quàm proximi: ut illi prodeſſe ſtude-
am bono exemplo: mihi verò extirpatione
vitiorum, per ſeriam pœnitentiam; & per
disciplinæ regularis amorem, plantatione
virtutum.

Vixit B. JACOBÈ, Vallis S. Lamberti
circa monache: qui adoleſcens obſervantiæ
annum monaſticæ addictus, in magna purita-
1187. te clauſtri latebras coluiſti; omnes de-
 licias in ſola orationis devotione quæ-
 rere ſolitus: nec aliter vitam, quàm ut
 piſſimè peracta eſt, ita feliciffimè clau-
 ſiſti. *Eſt uique hujus miſeræ vitæ ingens*
ſolacium devota oratio: felix contra ſatanæ
inſidias munimentum, & vulnerum ani-
mæ efficaciæ medicina. Cuius tamen velut me
vacuum eſſe doleo; ita) e rogo; ut veræ de-
votionis gratiam mihi à Deo impetres.

S. BER-

S. BERNARDUS, ser. 3. de Circumc.

Roga tibi dari devotionis lumen; diem serenissimam; & sabbatum mentis: Devo-
tio est
requies
animæ.
in quo tanquam emeritus miles in laboribus universis vivas absq; labore; dilatato nimirum corde currens viam mandatorum Dei. Ut quod prius cum amaritudine, & coactione spiritus tui faciebas; de cetero jam summa dulcedine peragas, & delectatione.

☉)(☽)(☉)(☽)(☉)(☽)(☉)

7 Januarij. 7 Idus.

Venerabilis Virgo Vidua, ELISA. Vixit
anno
1224.
BETHA de Wans, ex nobili Eburonum stemmate oriunda: quæ ætatis tuæ primitias in Aquiriensi monasterio inter sacras Virgines Cistercienses DEO consecrasti; Velum jam tum susceptura; nisi parentes cæco amore propaginis invitam militi copulavissent. Qui tamen, ut erat probitatis eximiæ, Conjugium
virgineum. Christi sponsam temerare non præsumens, integro anno ejusdem thori societate tecum ita usus est; ut prorsus intactam ad monasterium remisit. Nec amisisse te, sed feliciter mutavisse Sponsum, statim fuisti experta; dum
Spon-

*Chri-
stus in
Cruce
pendēs
ei appa-
ret.*

*Et An-
geli.*

*Mira
secreto-
torum
cognitio*

*Vatici-
nia.*

Sponsus castarum animarum Christus sub forma in Cruce pendentis, toto triennio, diu noctūque tibi spectabilis adfuit: cūque mundanæ cogitationis aliquid in cor tuum ascenderet, illico solutam à ligno manum ori tuo imposuit, donec flammâ Divini amoris tota arderes. Sponso successere cœlestes ephebi: quibuscum aut familiaria miscebas colloquia de beatorum felicitate; aut ijs deducuntibus in intima cœli arcana penetrabas: ubi non tantum sanctos, jam ibidem regnantes, sed & alios ad vitam immortalem vocandos, tam perspicaci oculorum acumine conspiciebas; ut eisdem postmodum, licet aliunde ignotos, ex facie agnosceres. Hos inter nobilis quædam virgo fuerat: quam cum mundo muliebri superbè comptam, cerneret eo ornatu futuri conjugis amores venari; eidem vaticinata es; non in alio, quam virginali statu morituram: eventus veritatem nemine non admirante; cum & ipsius, & parentum vota longè aliò propendere, palam foret. S. Lutgardi perquam familiaris eras: cujus sanctæ morti assistere, & ab eadem jam gloriosa ad nuptias cœlestes invitari meruisti. *Ora Divinissimum Amatorem tuum; ut non subtrahat mihi (licet id peccata mea mere-*

mereantur) oleum gratiæ & misericordiæ
 suæ: sed ex illo inexhausto fonte merito-
 rum, amarissimæ Passionis & mortis suæ
 impinguet animam meam; quo ditata, tan-
 quam prudens virgo, introire mereatur
 ad nuptias sponsi.

Oleum
 gratiæ
 DEI.

S. BERNARDUS, serm. 7. in Cant.

Sponsa dicitur illa, quæ amat: amat
 autem, quæ osculum petit. Non petit
 libertatem, non mercedem, non here-
 ditatem; sed osculum: more planè ca-
 stissimæ sponsæ, ac sacrum spirantis a-
 morem; nec omnino flammam dissi-
 mulare valentis, quam patitur.

Vera
 sponsa
 quæ?

(☉)(☉)(☉)(☉)(☉)(☉)(☉)

8 Januarij. 6 Idus.

B. TORPHIME, à puero illustris fa-
 mæ sanctimoniam, ac eruditionis:
 quæ etiam te ex umbra claustrali pro-
 ductum, in apertò Episcopatus Hu-
 mariensis theatro collocavit. Ex quo
 nunc publicis, nunc privatis congressi-
 bus hæreticorum errores confutasti.
 Quorum invidiam expulsus in exilium;
 velut antea egregij Pastoris personam
 strenuè implevisti; ita in naufragio, e-
 gesta-

Obijt
 anno
 1244.

Hæreti-
 cos con-
 futat.

gestate, ac morbis, invictum patientię pugilem te præstitisti. Quas tuas insignes victorias, æterni triumphi laureã in cœlo esse coronatas, indicavit suavissimus odor, qui è sepulchro tuo se effudit; dum sacræ corporis tui exuvię ex humili fossa ad publicam lucem ac venerationem fuerunt eductæ. *Aspira mihi odorem tuarum virtutum. Impetra mihi immobilem in bono perseverantiam, ut inhærens petræ cœlestis gratiæ anima mea nunquam patiatur peccati naufragium: sed de portu innoxie conscientiæ transeat ad æternæ salutis felicem portum.*

*Circa ã.
1300.*

*Apostata con-
versus.*

Pœnitentia.

B. BERNARDE: qui laudabile vitæ religiosæ principium, suadente maligno deserens, atq; ad pestifera mundi flagitia festinans, à Christo Servatore per visum increpitus, ad asceterium redijsti: ibique non solum admirandæ severitatis pœnalia opera, sed & sanctitatis signa edidisti: prodigijs etiam post mortem prodeuntibus; quem fructum ex gloriosa pœnitentia reportaveris. *Amaram quidem videtur habere radicem pœnitentiæ arbor: sed tu experimento tuo docuisti, quàm amabiles fructus proferat, si patientia constans ad maturitatem perduret. Excita ergo me, ut te sequar: nõ attendens ad laborem brevissimi temporis, sed mercedem præmij sempiterni.*

S. BER.

S. BERNARDUS, ser. I. de diversis.

Quòd si usqueadeo regnat in te peccatum: imò usqueadeo delectat te servire peccato; ut doleas, tibi modicum tempus esse, quo servias ei: sed eousq; latam diligis viam; ut omnimodis optes, si possis, eam facere longam: velis nolis, non longè est finis ejus: sed tu, fateor, longè es à regno Dei; & firmissimum pepigisse videris cum morte fœdus, pactum cum inferno.

Peccatoris impenitentis periculum.

(☉)(☽)(☉)(☽)(☉)(☽)(☉)

9 Januarij. 5 Idus.

B. PETRE, Caduini monasterij in Aquitania monache, omnibus singulariter chare & venerabilis. Cùm enim in te esses rigidissimus; in cæteros lenitatis & mansuetudinis (velut sol quidam terrestris) amabiles radios effundebas. In choro pietatem; in mensa sobrietatem; silentium ubique; nulli non animi demissionem colebas.

Floruit circa annum 1218.

Icon veri Religi.

Ejusdem Caduini Religiose, B. RADOLPHE, postmodùm Godonij Abbas, itidem multis virtutibus clare.

Juvate uterque infirmitatem meam vestra inter-

inter-

22 ANNI CISTERCIENSIS

*interpellatione: docete me sobriè justè & piè
vivere in hoc sæculo, ut merear in altero
vivere vobiscum beatè.*

*Obijt
anno
1231.*

B. JOANNES, è Villario ad monasterium Grandipratense destinate Abbas: qui cùm te ad debellandam tua eruditione, & sanctimonia Albigensium hæreticorum insaniam accingeres, in ipso pijsissimi conatûs initio triumphantem animam cœlo asseruisti. *Adesto mihi contra caput rebellium,*

Certandum

& omnium errorum principem decertanti: nec patere, ut me ipsum damnabili in peccatum consensu sponte nequissimo hosti dedam. Non sum de corona dubius, si pugnantem me mors invenerit.

*Vixit
circa
annum
1230.*

B. URRACA, fundatrix monasterij Barrensis, & ibidem à mariti obitu humilis monialis. Quæ licèt esses regio stemmate clara; te tamen non aliter, quàm vilissimam haberi voluisti. Atq; ita mutato vanitatis transitorio cultu, in nobilissima animæ ornamenta, sanctarum mulierum in cœlo numerum auxisti. *Instrue me utilissima hac, & ad salutem utriusque vitæ consequendam necessaria scientia; qua verè agnoscam hujus vitæ vanitatem; reputemque, juxta Apostoli monitum, omnia mundana ut stercora, quò Christum lucrificiam.*

*Mundi
contem-
ptus.*

B. SALOMON: qui primùm Divi Bene-

Benedicti; dein Præmonstratensium
 Instituti desertis temerariè signis; de- *Circa*
 mum pœnitentiâ ductus, sub vexillo *annum*
 Cisterciensi in Hemmenrode per sex *1212.*
 menses tanto fervore militasti: ut ni- *Deser-*
 hil rigoris, nihil austeritatis intermit- *tor verè*
 teres: non lachrymis, non gemitibus *resipi-*
 modum dares. Ita consummatus in *scens.*
 brevi, explevisti tempora multa: uti
 testabantur viri gravissimi; qui ani-
 mam tuam, luce splendidissima cin-
 ctam, in cœlos evolantem conspexere.

Ah etiam mihi facilem redde pœnitentiæ *Pœni-*
laborem; qua utique post tot commissa pec- *tentia.*
cata summopere indigeo. Peccasse, fragili-
tatis humanæ fuit: sit nunc Divinæ gratiæ,
à te mihi impetrandæ, dignos facere pœni-
tentiæ fructus.

S. BERNARDUS, *serm. I. de diver.*

Quid in incertum dies & annos nu- *Pœni-*
meras? Transit hora, transit & pœ- *tentiæ*
na; nec accedunt sibi, sed cedunt po- *condi-*
tiùs, & succedunt. Non sic gloria, *mentū.*
non sic remuneratio, non sic merces
ipsa laboris: nescit vicissitudinem, ne-
scit finem; manet tota simul, & ma-
net in æternum.

10 Januarij. 4. Idus.

*Obijt
anno
1209.**Canoni-
catus
dimit-
tit.**Egredi-
a vir-*

S. GUILIELME, clarissimâ oriun-
de profapia; utpote à regum cunis
deductâ. Quam tamen generis subli-
mitatem claritudine sanctitatis longè
transcendisti. Adhuc prætextatum,
curæ Avunculi tui, Sueslionensis Ar-
chidiaconi, tradidit parentum solici-
tudo: ubi cùm & morum ingenua sua-
vitas, & facile capiendis artibus inge-
nium te passim commendarent: non
alio quàm virtutum ambitu, Sueslio-
nensi ac Parisiensi Canonatu dona-
tus es. At illud ipsum donum; quia
mundi periculis nimium videbatur ex-
positum, animo generoso respuens, in
eremo Grandimontensi Religiosæ vi-
tæ fundamenta jecisti. Ad majorem
deinde vitæ austeritatem aspirans, ad
Pontigniacense monasterium transij-
sti: in quo Prioris primùm officio, in-
de Abbatis in Fonte Joaënis; rursus Ca-
roli loci prope Silvanectum, ubique in
celebri sanctimonia es perfunctus. De-
mum famâ pietatis ac virtutum in di-
es excrecente; in Primatem Bituri-
censis Ecclesiæ fuisti electus. In cujus
dignitatis fastigio collocatus; victus ri-
gore, animi demissione, & orationum
instantiâ monachum: in juvandis ege-
nis

nis, & afflictis communem omnibus *tutum*
 te patrem: in sustinendis contradicti- *conjun-*
 onibus, & persecutionibus, novum *Etio.*
 quendam primitivæ Ecclesiæ athletam
 exhibebas. Hanc tuam sanctissimam
 vitam copiosa prodigia comitabantur. *prodigi*
 Nam cuidam nobili foeminæ tuis pre- *is lucet.*
 cibus foecunditatem; Presbytero sani-
 tatem manûs aridæ contulisti. Cùm
 deniq; jussu Innocentij III contra Al- *bellum*
 bigenses gladio Verbi DEI, & milita- *in here-*
 ribus armis ad sacrum te bellum accin- *ticos pa-*
 geres; ante hostes ad singulare certa *rat.*
 men te provocavit vitæ mortalis præ-
 do: & is quidem classicum cecinit, dum
 tu in suggestu illa Apostoli verba ex-
 poneres: *Hora est jam nos de somno surge-*
re. Nec imparatum te deprehendit: sed
 statim ad necessaria huic pugnæ arma
 convolans, primùm decretorio confli-
 ctui SS. Ecclesiæ Sacramentis prælufi-
 sti: dein post decantatas coram te ma-
 tutinales preces, proprio nisu te humi
 prosternens, in cinere & cilicio placidè *sancta*
 exspirasti; pulchriore vultu, quàm vi- *mors.*
 vi fuerat, conspicuus. Illa verò nocte,
 qua decesseras, globus igneus supra Ba- *signa*
 silicam, tibi ad sepulchrum destinatam, *post obi-*
 visus, manifestum obtentæ gloriæ cœ- *tum.*
 lestis signum fuit; veluti & innumera
 miracula, quæ ad solum contactum
 B tui

tui corporis, triduo publicè expositi, Biturica obstupuit. *Imprime firmiter animo meo serium illud Gentium Doctoris monitum: Hora est &c. Surgendum mihi nempe de gravi veterno, in quo sepulta stertit vigilantia & cura æternæ salutis. Ab quot sanctæ & pretiosæ horæ dilabuntur sub hoc somno, tot sanguineis olim lachrymarum guttis deflendæ, quot continent momenta!*

Vigilās
cura sa-
lutis.

Obijt
anno
1293.

B. THEOBALDE: qui postquam in Claravalle Priorem; & inde Gratia Dei Abbatem eximia laude egisses: totius Ordinis Superior Generalis, ordine 27 electus; non tam dignitate muneris, quàm excellentiâ virtutum eminebas: præsertim firmitate animi in adversis; quæ tunc S. Ordinem graviter affligebant. *Jam dudum sapientissi-*

Quarē-
da vita
felicior

mus mortalium mortales omnes monuit: nihil esse in mundo, quàm vanitatem, & afflictionem spiritûs. Feram igitur fori animo communem omnibus sortem; & tanto alacrius aspirem ad felicem vitam illam, in qua nulla afflictio; sed pax & gaudium spiritûs florebit in perpetuas æternitates.

Obijt
anno
1620.

B. JOANNES à S. Hieronymo: qui cum esses secundus Fuliensium Generalis; principum Cistercij Patrum rigorem strictè, tam à te quam tuis exigens, Romæ sancto fine quievisti: præ-
clara

clara tua merita prodigijs ad tumulum
 indicantibus. *Arctam quidem elegisti ad
 celum viam; sed cuius asperitatem miiga-
 vit amor amplissima retributionis: qui u-
 tinam & meum occuparet animum! non* Spes
præmij
utique differrem per tua te vestigia sequi.

S. BERNARDUS, ser. I. de divers. excitat

*Habentes ergo promissionem, cha-
 rissimi, non deficiamus, aut fatigemur* ad labo
aliquando; nec grave caussemur onus rem
*Christi, quod teste ipso leve est; vel ju-
 gum, quod revera suave est: sed omne,
 quod videmur portare onus diei, æter-
 num gloriæ pondus cogitemus.*

(☉)(☽)(☿)(♁)(♂)(♆)(♄)(♃)

II Januarij. 3 Idus.

B. GUILLIELME: qui ab ineunte Obijt
 ætate in Cistercio educatus, ex Ab- anno
 bate Firmitatis Antistes X Archi-cœ- 1179.
 nobij adoptatus, totum S. Ordinem lu-
 ce virtutum tuarum exornasti: maxi-
 mè dum sæva per Galliam fame graf-
 sante, famam verè benigni sanctique
 Præsulis tua in pauperes liberalitate
 reportasti. *Pasce animam meam pane ce-
 lestis gratiæ, quo tu nunc Angelorum con-* Panis
gratiæ.
viva sempiternus abundas. Egeo pane vi-

B 2 te

28 ANNI CISTERCIENSIS

*ta & intellectus: à quo & lumen accipi-
am ad cognoscendam, & vires ad exequen-
dam Dei voluntatem.*

*Floruit
circa
annum
1222.* B. P E T R E de Confluentia: qui in primo ætatis flore S. Cisterciense Institutum amplexus es in Hemmenrode: ubi te ob singularem modestiam Abbas Carolus; ob vitæ puritatem ac innocentiam, cælum intimè amavit. Adhibebat ille te ad ministerium Altaris: in quo dum aliquando post solito more dictam Confessionem, pronunciamdam ab illo Absolutionem præstolare. *Voce
caelesti
à pecca-
tis ab-
solvi-
tur.* ris; è cælo delapsa vox, ejus verba prævenit; quæ te à peccatis immunem & absolutum asseruit. Haud rarò etiam dum eidem sacrificanti assisteres, audisti Angelos suavissimè accinentes. Sæpe ponebas quotidie certum tempus, contemplationi de J E S U Patiente impendendum. Et quanquam initia pijsimæ exercitationis arida, & fructu caritura videbãtur: tuâ tamen perseverantia effecit, ut nunquam sinè optato divini amoris incendio ab illo secessu redires. *medita-
tio quo-
tidiana* Quin ipsum denique Servatorem exorasti; ut ad firmandam in animo tuo dolorum ipsius memoriam, se tibi Sanguine suo sacratissimo rubentem, obtulerit spectandum. Neque hîc stetit Divina miseratio. Nam cum ar-
*spectat
Christũ
Patiem-
tem.* denter

denter desiderares, non mentem solummodò, sed & corpus ab omni labe purissimum conservare: idque coram Christi in Cruce pendentis imagine gemitibus & lachrymis magis quàm verbis à DEO postulares; Puritatis amator solutis de ligno brachijs te amplexatus, omnem sensum extinxit, quo desiderata munditia legi potuisset. Liquefecit tanta amoris inundatio cor tuum: unde mirum non fuit, vix unquam posthac siccos à fletu te oculos habuisse. Sed & alios lachrymarum fontes inveniebas: quorum alterum aperiebat memoria peccatorum, quibus impij DEUM offendunt: alterum recordatio Bonitatis immensæ, quam Divinus amor in omnes, etiam sceleratissimos non cessat effundere. Ad quos de criminum barathro educendos, Apostolico spiritu succensus, Theoderico Livoniæ Episcopo te socium adjunxisti: ac postquam per plures annos barbaris illis gentibus Legis Christianæ præcepta tradidisti, inter ipsos sanctos labores vitam posuisti. *Ora Deum, tibi adeo propitium, ut & meum cor liquefaciat atque emolliat: quòdque hætenus ad ejus toties repetitam vocem durum fuit, nunc tandem lique scat, & se in ejus amorem, totum quantum est, transfundat.*

*qui illi ample-
xu con-
fert do-
num
purita-
tis.*

*Causæ
lachry-
marum.*

*Aposto-
lus Li-
vonia.*

*Cor li-
quidū.*

S. BERNARDUS, *serm. 5. de divers.*

Hodie si vocem ejus audieritis:

Vox di-
vina
nunc a-
mabilis
post for-
midabi-
lis.

&c. [psal. 54.] *Utilius namq; & multo salubrius est, hodie eum audire consulentem, consolantem, admonentem, docentem, & ut multum, arguentem, increpantem, corripientem: quam in die illa tam amara, tam lugubri, tam tenebrosa, audire illum judicantem, indignantem, ulciscentem, sevientem, condemnantem.*

(☩)(☩)(☩)(☩)(☩)(☩)(☩)(☩)

12 Januarij. Pridie Idus.

Obijt
anno
1166.

SAILREDE: quem nobilitas generis, & preclara indoles Davidi Scottorum Regi cum primis gratum fecit: ita ut adhuc juveni summam regie domus præfecturam demandaverit. His tamen amoribus spretis, pro luxu jejunia, pro fastu paupertatem in Rievalle quaesivisti, totâ stupente Insulâ, quod ætatis floridæ delicias, & fortunæ aridentis favores tanta mentis generositate contemneres. In Abbatem successu temporis electus vix persuaderi poteras ad acceptandam dignitatem; licet esses dignissimus: sicut & alios honores à Rege oblatos constanter recusasti

cu fasti. A negotiorum æstu libero gratius non fuit refrigerium, quàm sacra solitudo; in qua plusquam quadraginta libros, cęlesti potiùs, quàm humana eruditione refertos elucubrasti. Quod deniq; omnium laudum tuarum compendium est; alterum te BERNARDUM communis per orbem fama deprædicabat. Ei te similem fecerunt sprete Infulæ; contempta mundi gloria, & contemptorem sequens: quæsita quies; sed sæpius charitate ad publica regni negotia vocante interrupta. Tum zelus Justitię: morum & eloquij mellita suavitas. Et demum scientia infusa, quæ solum DEUM agnosceret magistrum.

Exora mihi à Deo spiritum, quo aurea illa soliloquia eruētabas. Ut eodem fervore tecum sæpe suspirem, dicamque: [Quæsi vi requiem infelici animæ meæ: sed ubiq; labor & gemitus... Clamasti, Domine, clamasti, vocasti, terruisti, rupisti surditatem meam. Audivi, sed heu serò clamantem...

Itaq; intendi in meipsum, quid essem, ubi essem, qualis essem. Exhorruï & expavi, Domine, propriam effigiem meam: terruit me tetra imago infelicitatis animæ meæ... Cæpi ergo conijcere, quantum inexpertus potui; imò quantum tu dedisti; quanta in tua dilectione jucunditas; quanta cum jucunditate tranquillitas; quanta cum tranquillitate securitas &c.

B 4

Clarus scribēdi copia, et nitore.

S. Bernardo similis.

Speculi chatit. lib. 1. cap. 28.

Consideratio sui ipsius.

*Floruit
anno
1140.*

*S. Bern-
nardo
intimè
famili-
aris;*

*Abdi-
catâ di-
gnitate
mona-
chum
induit.*

*scribit
vitam
S. Bern.*

B. GUILLIELME, S. Theoderici in Ordine D. Benedicti quondam Abbas; ac eo tempore Mellifluo BERNARDO intimè familiaris. Quem cum in suo tugurio sub rustici stentoris cura laborantem inviseres, summè admiratus es beatissimi Patris serenam animi tranquillitatem, in vexatione tam dira & prorsus inhumana. Tu interim feбри correptus, ab eo sic afflicto altera vice restitutus es sospitati. Accendebat, non satiabat amorem tuum paucis subinde diebus gaudere amici præsentia. Ut igitur te illi indissolubili vinculo adstringeres, optabas, relictâ Abbatia in Claravalle monachum induere: sed nullis precibus à BERNARDO impetrasti, ut consentiret. At verò moræ impatiens, illo nequicquam obstante, in monasterio Signiacensi pulchram vestem in candidam permutasti. Hic non soli tibi, sed & posteris denuo invenisti BERNARDUM: cujus effigiem in tuis de ejus vita commentarijs stylo suavissimo expressisti. Tandem ætate & laboribus confectus, ad dilectum tuum, non ampliùs in Claramvallem, sed paradisi delicias emigrasti. *Inflamma me ardenti illo amore, quo tu dulcissimum amicum tuum complectebaris. Fac, ut illum ubiq; oculis memoriæ, velut præsentem*

sentem, & actiones meas moderantem, in-
 tuear. Illum in mellifluis scriptis suis stu-
 dium perfectionis tam suaviter instillan-
 tem, quam seriò inculcantem pro viribus
 sequar. Ille vicissim mihi succurrat in ne-
 cessitatibus meis: adjuvet pugnantes in
 tentationibus: donet industriam in labori-
 bus: adsit unà tecum mihi in postremis vi-
 ta angustijs: jungat denique me sibi tibiq;
 in illa felicitate, ad quam suspiravit, cum
 scripsit:

S. BERNARDUS, serm. 2. de diver.

Quando veniam, & apparebo ante
 faciem Dei? Quando cessabunt hæc
 omnia, & jam non erit amplius neq;
 luctus, neq; clamor, sed nec ullus do-
 lor? Quando inebriabit animam u-
 bertas domus Dei, & torrens ille in-
 deficiens Voluptatis Divine? Quan-
 do totam sibi eam serenissimi contem-
 platio luminis vendicabit? Filioli,
 concupiscamus in atria Domini; cre-
 brò suspiremus illuc.

Amor,
 venera-
 tio,

patroci-
 nium S.
 Bernar-
 di.

Gemi-
 tus ani-
 mæ su-
 spiran-
 tis in
 cœlum.



B 5

13 Ja-

(D) (S) (D) (S) (D) (S) (D)

13 Januarij. Idibus.

*Obijt
hac die
anno
1227.*

*Amās
pudoris
secūdas
nupti-
as re-
nuit.*

*damo-
nes sig-
no Cru-
cis fu-
gat.*

BIVETA: quæ à nobilibus, & successione nimis avidis parentibus anno ætatis decimo tertio ad matrimonium coacta, animum tam aversum ab ejus usu gerebas; ut primis statim diebus aperte fueris protestata: si ante contracta vincula tibi constitisset, subeūdum tam necessariò in illo statu pudoris naufragium; nullo parentum imperio, nulla vi ad nuptias adigendam fuisse. Ex ea tamen animi tortura te mariti mors intrà quinquennium exemit. Post quam cū & forma & opes multis procis esset illicitio, ut te ad secundas nuptias expeterent; pertinaciter omnes rejecisti. Verūm qui sub honestatis specie mentis constantiam labefactare non poterat; solita larvarum suarum machinamenta adhibuit pudicitia hostis: ea tum maximè obijciens, dum ante auroram ad Ecclesiam properabas. Et concutiebant haud immeritò te fœda inferni monstra: ijs autem Divina illustratione agnitis, imperterrita, emissò Crucis signo fugam imperasti. Majoris periculi pugnam cibat adolescens; qui affinitatis jure liberiùs ædes tuas frequentans, cū verborum

borum telenocinia nihil moverent, vim meditabatur; solam furtivo noctis conticinio oppressurus, nisi pro te cœlum stetit. Jam enim pessulum ostij removerat; pedem mox & injuriam illaturus. Cùm inter eas angustias alterius auxilij ignara, afflictorum solatium MARIAM implorans, illico hac Stella lucente securitatis portum tenuisti. Nam ipsa cœlesti lumine radians, cubile ingressa, adeo tenebrionem percelluit; ut jam de fuga magis, quàm de scelere sollicitus, tremens viam ad stratum suum relègerit. Non placuit ultrà cum his periculis luctari. Quare ut eorum ansam è medio tolleres; filijs, quos geminos genueras, avo cum bonorum parte commissis, leproforum te famulatu addixisti: inter quorum foetores ac sordes ea versabaris animi hilaritate, ac si cum rosis luderes: admirante totâ viciniâ, & ad rei novitatem spectandam accurrente. Angebat intereà te cura de salute parentis, mundi negotijs nimis impliciti: cui à DEO precibus tuis impetrasti; ut sæculo valedicens, Villarij Cisterciensibus se monachis adscripserit. Ad idem Institutum in Aurea Valle suscipiendum inductus est à te filius natus major: à cujus loci Abbate & tu Cisterciensem amicum

*Marie
presens
in neces-
sitate
auxili-
um.*

*leprosis
servit.*

*parenti
conver-
sionem
impe-
trat;*

& filio.

miētum legēsque accepisti, ad quas in solitaria cellula vitæ reliquum transigeres. Restabat curarum suprema, junior filius. Is per abrupta vitiorum ruens, paternæ hereditatis assem adeo brevi temporis intervallo decoxit; ut ad incidas redactus, jamjam desperationis abyssō videretur absorbendus: eum tamen facultatibus primū, inde orationibus ita iuvisti; ut ejuratā pessimā vivendi ratione, & ipse Cistercio se in monasterio Trium Fontium addixerit. Fortunæ bonis sic per alienam prodigalitatē exuta, masculo nihilominus animo fundamenta, cōdendo Parthenoni jaciebas. Cūque te multi temeritatis arguerent, tu cœlitus edocta, eam vaticinata es loci amplitudinem; quam tunc nemo credebat fore possibilem; omnes post paucorum annorum curriculum admirabantur. Adoptaveras in solitudinis tuæ tutelam Misericordiæ Matrem; ex præstito olim subsidio, sed & aliàs per mirabile ostentum de illius in te propensione secura. Videbaris enim tibi aliquando, te DEO Judici sisti ream; ferrique in te damnationis sententiam, ob inultum hætenus crimen; quod cōtraxisse insimulabaris; quando continentię desiderio, ausa fueris innoxij cętera mariti

*Alterū
nem fi-
lium re
ducit
ad fru-
gem.*

*futura
prædi-
cit.*

*Occulti
crimi-
nis per
visum
argui-
tur.*

riti

riti præmaturam mortem optare: mutatum verò repentè Judicis animum, ubi reorum Advocata, Virgo Mater, pro te ad Filium peroraverit: & id quidem tanta eloquentiæ vi; ut in iræ locum succedente amore, te Judex ad osculum admiffam, dulciffimæ Matri suæ ut fingulare depositum, suo tempore ab illa repositum, commendaverit. Patebat exinde liber tibi in cœli arcana ingressus: dum frequentiffimè rapta, talem ibi rerum scientiam hauiffi; quæ veluti vires humanas superabat; ita multis peperit salutem. Nam fœminam quandam graviter lapsam ad penitentiam persuasiffi; & ejusdem complici pavendam mortem prædixiffi, qui tua monita aspernabatur. Illud profectò stupendum; quòd virginem tibi pro innocentia sua dilectam, per-versus quidam clericus, sub pietatis velamine, ad aliam provinciam abduxit; ut eam aut vi, aut blandimentis ad seculus haberet obnoxiam: quam tamen precum tuarum scuto ita protexiffi, ut columbam è milvi unguibus ereptam, illæsam receperis. Innumera hujusmodi divinitus cognita operaberis: ita ut quisquis animi ægritudine aliqua premeretur, certum apud te remedium inveniret. Appetebat denique tempus,

*absolvi
tur;*

*Et novo
favore
dona-
tur.*

*cordis
secreta
cogno-
scit.*

*virginē
à vi pro-
digiosè
servat.*

*Premone-
netur
de hora
mortis.*

*audit,
dimissa
sibi pec-
cata.*

*Maria
adeft
moriēti*

quo solutis corpusculi vinculis anima ad notas sibi beatorum sedes se recipe-
ret. Quod felix momentum integro
anno prius, quàm instaret, cognovisti
à D. Maria Magdalena; quæ te per vi-
sum ad Christum Servatorem deduxit:
cujus pedes cùm Sanctę illius exemplo
multis lachrymis irrigares; optatissi-
mam illam sententia n audire merui-
sti: *Dimissa sunt tibi peccata tua, quia di-
lexisti multum.* Die igitur desideratissi-
ma illucescente; postquam Sacramen-
ta ad illud tempus spectantia devotè
susceperas; adfuit spectabilis Angelo-
rum Domina: quæ animam tuam, ve-
lut depositum suæ olim fidei creditum
Filio suo consignavit. Optaveras, ut
filius tuus, Aureæ Vallis Abbas, ulti-
ma monita tua præsens auscultaret;
quibus illum ad regiminis abdicatio-
nem inducere parabas. Attunc nego-
gotijs impeditus, à te mortua inde di-
dicit, fecitque, quod à vivente audire
superfederat. Ejus interea vices supplē-
vit Abbas Floreffiensis; cui etiam con-
scientiæ tuæ arcana detexisti, futuro
tuæ sanctimonix testi & præconi: di-
ctorum ipsius fidem firmantibus pro-
digijs, quæ frequentissima sepulchri
tui gloriam celebrabant. *Non permittit
lux illa Deitatis immensa, mortalibus in-
accessi-*

accessibilis, sed beatis omnibus plenè communis, ut ignores gemitus meos & suspiria, curas & angustias cordis mei, quibus à Divina misericordia impetrare contendo pauca illa, sed supra omnes thesauros expectanda verba: Dimissa sunt tibi peccata tua: Quæ ut saltem tunc audiam, cum anima Tribunali divino sistetur; impetra mihi nunc gratiam diligendi multùm, ut consequar multam misericordiam, heu nimis bene conscius, quàm peccaverim multùm.

Sollicitudo de obtinenda peccatorum remissione.

B. HENRICE, olim S. Cuniberti in Colonia Agrippina Canonice: qui cum in eo statu salutis tuæ curam negligentius ageres; Beatissimam tamen DEI Matrem quotidianis precibus venerareris: ejus instinctu & ope cenobium Veteris Montis adisti. In quo post non minùs fervidum, quàm diuturnum in obsequio Divino laborem, clarus virtutibus obiisti.

Circa annum 1220.

B. item HENRICE: qui monasterium in Suevia, cui Anguli nomen, ædificasti, idemque Angelica vivendi ratione tam celebre fecisti; ut fama per omnem Germaniam ex angulo illo diffusa, gloriosum tibi nomen in benedictione reliquerit. *Orate pro me ambo, & docete me imitari sanctum illum angulorum amatorem, qui dicere solebat: In omnibus requiem quasi vi, & non inveni, nisi in angellis & libellis.*

Circa annum 1190.

S. BER

S. BERNARDUS, ser. 1. de divers.

Eleva-
tio mē-
tis ad
superna

Studeamus etiam furari aliquando nosmetipsos, & à pessimis occupationibus istis surripere vel ad horam; jaculari animos, vibrare corda in id, quod sursum est, & quod quanto naturalius est, tanto suavius est.

(OS)(DO)(OS)(DO)(OS)(DO)(OS)

14 Januarij. 19 Cal. Febr.

Obijt
anno
1144.

B. AMADÆE: in quem mundus maximos, quos suis amatoribus propinat, favores effudit. Stemma, Romanorum Imperatori proximum. Opes generi pares: formæ decus excellens: bellica fortitudo, ad æmulum invidiam magnanima. Utcunque autem tibi applauserit fortuna, tanto clariùs vanissima illius ludibria deprehendebas, quo altiùs ijsdem eras immersus. Transactis igitur aliquot in matrimonio annis, & jam prole auctus; primum te, dein sedecim è prima nobilitate commilitones, ad mundi contemptum, & capeffendum vitæ Religiosæ statum persuasisti: quos ad Cisterciense Bonæ Vallis monasterium deduxisti; ijsdem juncturus filium, nisi infirmior

Plures
secum
ducit
ad reli-
gionem.

ætas

ætas eum tunc prohibuisset. Hic, ut
 principia maximè fervere solent, tan-
 ta contentione ad apicem monasticæ
 perfectionis properabas; ut penè mor-
 talem exuisse videreris; nisi te homi-
 nem paulò liberalior in filium affectus *filius*
 ostendisset. Nam cum is non pro voto *fit illi*
 tuo, sed pro religiosa modestia, literis *petra*
 profanis imbueretur: illum ex Bona *scādali*
 Valle Cluniacum transtulisti; ignarus,
 quòd illo itinere teipsum seduceres. Ibi
 enim summo honore exceptus; atq; in
 sede post Abbatem prima collocatus,
 cepisti primò inter se conferre utriusq; *transit*
 Instituti formam; laudare dein Cluni- *ad Clu-*
 acensium; denique etiam, quia mitius, *niacen-*
 Cistercio præferre: & ne ab animo dis- *ses:*
 creparet vestis, dimissâ cucullâ candi-
 dâ, nigram induere. Verùm amoto vi-
 sùs interioris obice (filio ad aulam avi *mox do-*
 Imperatoris dimisso) tibi redditus, im- *let, &*
 mensum doluisti: quòd qui olim nobi- *redit.*
 lissimæ cohortis dux ad religiosam mi-
 litiam, nunc primus & solus desertor
 audires. Itaq; facultate obtenta à Pon-
 tio Abbate, Bonam Vallem repetisti.
 Ubi extra portam multis diebus hæ-
 rens, téque coram singulis prætereun- *pœnitē-*
 tibus, inter lachrymas, & gemitus pro- *tiam*
 sternens, verè pœnitentis animi ima- *agit.*
 ginem repræsentasti: totidem menses
 ibidem

*mira
humili
tas.*

*Quatu
or ceno
bia con
struit.*

ibidem demorari paratus, quot Cluniaci transegeras. Sed sancti Abbatis humilitas tuam denique pervicit; dum ipsemet integro die in exercitij poenalis consortio tecum perseverans, pudore, quod verbis non poterat, persuasit, ut communi fratrum cœtui te jungeres. Locum, non animum mutabas: nullum enim tam vile & abjectum fuit laboris genus, quod tibi non vendicares: importunis precibus accepta potestate; ut calceos inungendi negotium (imò & loca sordida repurgandi) uni tibi relinqueretur. Aucta interim incolis supra vires Bona Vallis, exonerrare se emissâ coloniâ quærebat. Cui ut locum conquireres, ab Abbate destinatus, paucorum mensium intervallo, cœnobiium fabricasti in Mansiade: pari felicitate tertium exinde usus in aliorum monasteriorum constructione: nec admisisses quietem; nisi ab invito senectus extorsisset. Quæ quidem non exiguum tibi solatium attulit; dum filium Amadæum ex monacho Clarævallis vidisti Abbatem Altæ Cumbæ, & Lausannæ Episcopum. Sed longius duraturam quietem indulsit denique beata mors; quam inter Ecclesiæ sacramenta suaviter oppetisti. *Quamdiu spirat humanum cor, tam diu amat: sed tunc*

tunc pessimè, cum seipsum. Tu in hac scho-
la exercitate pugil, doce me bene dignoscere
cordis affectus, quò ferantur; illosque eli-
minare; si ad aliud, quàm summum Bo-
num respiciant.

B. HEILIGA, S. Ordinis Cisterci-
ensis Reclusa: quæ solis fidelium elee-
mosynis vitam sustentans, intrà limi-
tes cellulæ tuæ de totius mundi con-
temptu, vera paupertatis alumna tri-
umphasti. Nomen tibi congenitum,
quod humilitas tua, nesciri cupiens,
suppressit; Germaniæ simplex devotio
substituit. Ut, quamvis plurimæ reve-
lationes cœlestes te DEO gratissimam
esse non comprobassent; vel inde pate-
at, te meritò ut sanctam coli; quam
communis acclamatio populi jam vi-
vam retulit inter sanctitatis titulo di-
gnos. *Vivam & ego sanctè. Sanctum sit*
cor; non nisi sanctum Dei & Sanctorum
ejus amorem admittens. Sit lingua sancta;
ne Sancto Sanctorum se indignè in culci-
tram substernat. Sint & manus sanctæ;
memores, se contrectare illud mysterium,
quo sanctius nec cœlum habet, nedum mor-
tales & c.

B. BERNARDE, innocentiae Sal-
siniensium Virginum custos, & confci-
entiarum director fidelissime: qui in
pijs illis laboribus usq; ad senium san-
ctè

Amor
sanctus.

Vixit
circa
annum
1202.

Vita
sancta.

Floruit
circa
annum
1484.

44 ANNI CISTERCIENSIS

Etè perseverans, meritis & annis plenus migrasti ad Dominum. *Doce me ita studere puritati conscientia, ut extrema omnia pati eligam; quàm peccare vel semel: exteriorem verò hominem ita ordinare; ut promptior semper inveniar ad perferendas, quàm inferendas molestias.*

Puritas
consciē
tia.

S. BERNARDUS, serm. 4. de divers.

Horror
peccati

Beatus homo, & abundanti spiritus influens majestate; qui suavis & unctus portat omnes, & neminem onerat ipse: qui terribilius & horribilius ipsâ gehennâ judicat, in re vel levissima vultum Omnipotentis scienter offendere.

(—)(—)(—)(—)(—)(—)

15 Januarij. 18 Cal. Febr.

Vixit
circa
annum
1147.

B. CUNANE, Abbas Marganensis cœnobij, simulque pauperum illius regionis communis parens: quos multiplicatâ sæpe divinitus annonâ liberaliter alebas. Imò eorundem gratiâ à DEO impetrasti; ut fruges agri integro mense ante consuetum tempus maturescerent: horribili vindicta cœlitus in eos sæviente; qui in bona à te pau-

pauperibus destinata, erant injurij. *Expectat jam diu Dei Bonitas, ut jacta in cor meum salubrium inspirationum semina maturescant ad bonorum operum fructus: sed heu pretiosum hoc semen cecidit in terram aridam. Tu gratiæ cœlestis imbres implue: ut desinentibus miserrimæ sterilitatis annis, succedat lata virtutum fecunditas.*

B. PLACIDE à S. Mauro, in Congregatione Fuliensi famule infirmo-
tum impigerrime. Qui postquam in
charitate, humilitate, & mansuetudi-
ne admiranda, per multos annos mu-
nere tuo perfunctus es: prædictâ à te
mortis horâ inter preces geniculans,
& oculis in cœlum (haud dubiè jam
patens) erectis, purissimam animam
efflasti. *Erige oculos mentis meæ ad per-
vigil illud lumen Divinæ præsentia, omnes
conscientiæ angulos, omnes cordis & re-
num motus scrutantis. Ac licet in sede ma-
jestatis suæ lucem habitet inaccessibilem;
quæri tamen desiderat: & ne inventu sit
difficilis; ultrò se nobis insinuat, sibi nos
intimè per Conservationem conjungit. Ut
proinde meritò cum viro secundùm cor Dei
erigendi sint oculi mei semper ad Domi-
num.*

S. BERNARDUS, ser. 4. de diversis.

*Hinc probate vos, fratres, si in via
estis*

Fructus
bonorū
operum

Obijt
anno
1610.

Præsen-
tia Dei.

Quis
quærat
faciem
Dñi.

estis, si non exorbitatis. Latetur, inquit, cor quærentium Dominum. [psal. 104.] Si gaudetis ad labores; si inoffenso, si indefesso pede curritis viam mandatorum Dei: si quotidie utriusque hominis status recentior est ad proficiendum, & perficiendum, quàm ad incipiendum; profectò quæritis faciem ejus semper.

(☩)(☩)(☩)(☩)(☩)(☩)(☩)

16 Januarij. 17 Cal. Febr.

Floruit
circa
annum
1170.

ROLANDE, Cœnobiarcha Chèseriaci in Sabaudia; qui doctrinam virtutibus, & has prodigijs illustrans, adhuc mortalis, consueta illis temporibus apotheosi, per vulgi acclamationem colebaris. Nec exspiravit cum vita miraculorum potestas; quam feliciter experti sunt; quoscunque ad tumulum tuum piè precantes inveniebas. Porrò ad confirmandam augendamque plebis devotionem, suos quoque thesauros adjunxit cœlica in terris potestas: ut seu corpore seu animo ægri accurrerent, optatum utrique beneficium auferrent. *Unam hanc à te gratiam efflagito; ut te iuvante discam sacros Indul.*

dulgentiarū thesauros mihi diligenti studio colligere. O quàm optabo in illo exitū mei, id est totius aeternitatis articulo; ut ingentem cumulum ejusmodi gratiarum mihi comparassem; quo me nempe à piacularibus flammis redimerem!

Indulgentiæ.

B. GODEFRIDE de Perona: qui mellifluis BERNARDI concionibus ad Claramvallem attractus, adeo sub sanctissimi Magistri disciplina proficisti; ut postquam Prioris officio diu functus eras, tam ipso, quàm Eugenio Pontifice suffragante, ad Nannetis & Tornaci Episcopales cathedras vocatus fueris. Sed tantis licet precibus humilitas tua expugnari non valuit, nec adduci ad consensum. Æqualem huic sibi rigidus. mentis demissioni cōstantiam exhibuisti in observantia regulari: in qua velut officio, ita continua in teipsum severitate reliquis longè præibas: nullius unquam remissionis patiens, usque ad beatam mortem, quam suaviter cantans, ac inter insolita piæ lætitiæ signa obiisti. Cum verò non deessent, qui de salute tua dubitarent, ob nimiam in recusandis Episcopatibus pertinaciam: cuidam ex illis per visum te in luce cādidissima ostendisti; cum dicto: te ex illo honorum contemptu meriti augmentum reportasse perquam maximum

Obijt

anno

1146.

honores

recusat

sibi ri-

gidus.

Canens

mori-

tur.

mum

48 ANNI CISTERCIENSIS

Fletus
in vita,
cantus
in mor-
te

mum: quin, addidisti, futurum fuisse, ut æternum damnareris, si acceptasses. *Cygnorum est, mortem cantando excipere. Cygnum nempe te probavit non tam vestium quàm animi candor. Fac, ut & ego colore cygneo, id est mentis candida puritate resplendeam: & ne in illa flebili mortis hora nimis serò lugeam, doce me nunc, dum gratiæ tempus est, peccata mea deflere.*

S. BERNARDUS, ser. II. de divers.

Caven-
dum à
sæculo,
& pro-
pria vo-
luntate.

Studeamus, dilectissimi, immaculatos nos ab hoc sæculo custodire, scientes, quoniam Religio munda & immaculata coram Deo hæc est. Caveamus autem à propria voluntate, tanquam à vipera pessima & nequissima, & que sola deinceps damnare possit animas nostras.



17 Januarij. 16 Cal. Febr.

B. ALGOTE: qui sub institutione *Electus*
 suavissima BERNARDI eruditus, e- *anno*
 jusdem suffragijs, virtutes tuas pro *1147.*
 merito æstimantibus, Episcopus Curie
 creatus; munia pastoris optimi, cum
 observantia monachali conjungens;
Martha simul, & *Mariae* partes fuisti af-
 secutus. Multa monasteria aut noviter
 crexisti, aut instaurasti collapsa. Ege-
 nos innumerabiles è suis miserijs sub-
 levasti. Felicem Rhetiam, si hac nostra
 ætate illam Fidei orthodoxæ purita-
 tem non odisset, quam à te ante quin-
 que sæcula, vitæ sanctimoniâ, & pro-
 digijs confirmatam accepit. *Sed & me*
felicem, si quam tu inter publicas negotio- *Morum*
rum turbas servasti religiosam vitæ mode- *decetia*
stiam, ipsorumque decentiam, ego ubiq; imi-
tari studuero. Tu orbitâ timoris Dei me
circumda, quam nullibi transgrediar.

Sancti, ac Beati Monachi, & Con-
 versi VILLARIENSES: quorum
 relictæ in hac terra Exuviae, ante 79 *Anno*
 annos ab hoc præsentis, hac ipsa die *1599.*
 per solennem pompam Translata, &
 pretiosè exornata sunt. *Transferte &*
me, atque elevate à terra, à concupiscen-

C

iij

50 ANNI CISTERCIENSIS

tis terrenis, ad pia desideria cæli: ita ut veraciter cum illo tertij cæli spectatore dicam: Nostra conversatio in cælis est.

*Circa
annum
1250.*

B. THEOBALDE, ex divite Castellano pauper & humilis in Villario monache: qui in genuina cordis simplicitate, & indefesso fervore, ad æternæ gloriæ bravium cucurristi. *Impetra mihi cor simplex, & rectum; quod recto semper cursu feratur in simplicissimum illud, & immutabile Bonum, ab non uno tantum ac simplici corde, sed totis mille cordium affectibus amandum!*

*Obijt
anno
1623.*

B. GUILIELME à S. Alexio, quem inter primos celeberrimi sui Instituti alumnos numerat S. Congregatio Fulienfis. In qua quamdiu vixisti, veluti suprema virtutum, ita sectabaris extrema paupertatis & spontanei cruciatûs. Solam nudamq; humum quieti per noctem modicæ substernebas. Victum intrâ limites herbarum & leguminum tenuisti. Sub Psalmodia ad exhibendam corpore, quam mente gerebas, reverentiam erga Divinæ majestatis præsentiam, caput nunquam tegebas. Vigilandi continuam legem sola te opprimens necessitas solvebat; cum aliàs in oratione noctes ducere insomnes tibi esset perquam familiare. Et harum virtutum sinceritatem probavit

*Vita
magna
austeri
tas.*

bavit perseverantia; quam ad ultimum
 ulque vitæ spiramen, sub sacra Uncti-
 one emissum, in eodem nusquam ex-
 errante tenore conservasti. *Quàm di-
 versam invenio vitæ rationem, si meam
 cum tua comparare voluero! Tu excita*
me, ut jugum Domini suave, licet carni &
sanguini grave esse videatur, virili animo
tollam. Non denegabit suæ gratiæ subsi-
dia, qui debiles humanæ miseriæ vires non
ignorat.

Jugum
 Christi
 virili-
 ter tol-
 lendum

S. BERNARDUS, serm. 5. de divers.

In duobus tota spiritualis conversa-
tionis summa versatur: ut in nostra
consideratione turbemur, & contri-
stemur ad salutem; in Divina respi-
remus. Atq; hinc timorem & humi-
litem; inde verò spem concipia-
mus, & charitatem.

In Dei
 bonita-
 te respi-
 randū.

☩)(☩)(☩)(☩)(☩)(☩)(☩)

18 Januarij. 15 Cal. Febr.

SANCTISSIME Theodidacte,
 Doctor Melliflue BERNARDE,
 eminentissimæ sanctitatis universale
 speculum; Sol sanctimonie. Cujus san-
 ctissimam Innocentiam nulla, nisi san-
 ctissima lingua tua, pro dignitate elo-
 quetur

C 2

Anno
1174

Solus
ex plu-
ribus
Canonis
sancto-
rum in-
seritur.

Tanti
Patris
filios
deceat
non esse

quetur: *cujus sanctissima gesta nullus, nisi cœlestis ille stylus tuus pro merito exornabit. Qui hodierna die ante annos quingentos & quatuor: post obitum sanctissimum, anno Undecimo, ab ALEXANDRO PP. III. per exquisitum Diploma Sanctis adnumeratus, ac totius orbis publicæ venerationi propositus, Clarissimam tuorum prodigiorum splendore Vallem, hujus accessione novi luminis effecisti quoque sanctissimam. Solem te appellavi: & talem te hæc ipsa demonstravit aurora. Nam cum Alexander post Concilium Turonense publicationem istius Decreti, præter expectationem suspendisset; dilationis causam in datis ad Claravallenses literis disertè aperuit. Quod nimirum plures ipsi fuerint simul exhibiti, quos rogabatur Divorum Albo adscribere: quam petitionem ideo fuisse prorogandam; ut ceteris opportunius denegaret. Sidera erant illa sanctimonix; quorum lumen evanuit, dum tu, velut Luminare majus, mundo exoriebaris. Respice, Pater sanctissime, de gloria tuæ sanctuario in nos filios tuos, & tuæ sanctitatis luce ita animos nostros perfunde; ut sanctissimarum virtutum tuarum impigri emulatores, firmâ semper revolvamus memoriâ, quam*

*quàm sancti Parentis filios nos esse glorie-
mur: ac proinde quanto studio allaboran-
dum sit, ne inveniamur esse degeneres.*

B. EBER HARDE, Villarij mo-
nache; Taciturni cognomen à strictis-
sima silentij regularis observatione a-
depte. Cujus leges ut aliquando trans-
gredereris; te in via publica verberibus
& contumelijs milites cogere tentave-
runt: sed irrito conatu: dum tu ad in-
jurias immobilis, ne quidem edito of-
fensi animi signo præstitutum iter fui-
sti profecutus. Eo autem tempore, quo
loquendi copiam sacra Regula facit,
tantæ virtutis verba emittebas; ut ad
eorum sonum feræ mansuescerent. In-
jice etiam meæ, ad vana proclivi, & tarde
ad Divina, lingue frenum silentij: ut ni-
hil proferat, quo Deus aut proximus offen-
datur: fac, ut de me cum veritate dici possit,
quod de Humberto suo quondam scripsit

S. BERNARDUS, ser. in obitu B. Hüb.

*Quis unquam ex ore ejus sonum de-
tractionis, verbum scurrilitatis, ser-
monem gloriæ, invidiæ vocem audi-
vit? Quis eum vel alios judicantem,
vel judicanti consentientem aliquan-
do deprehendit? Nimirum sollicitè*

C 3 *custo-*

degene-
res.

Circa
annum
1300.

Custo-
dia lin-
guæ.

Sermo
in culpa
bilis.

custodiebat vias suas, ut non delinqueret in lingua sua; sciens, quia qui in verbo non offendit, hic perfectus est vir.

(—)(—)(—)(—)(—)(—)(—)(—)

19 Januarij. 14 Cal. Febr.

Cöversus aⁿ
1146.

BHENRICE, Monache Claræval-
lis: qui à corporis in arctum quod-
dam compendium coacti specie, no-
men *contracti* sortitus es. Animum
tamen amplissimum in te aut invenit,
aut fecit BERNARDUS. Cùm enim
Nuncij Apostolici munere fungens,
Constantiæ pro suggestu diceret; tu in-
ter primos Divini eloquij vim sensisti:
moxque Pijssimum Patrem accedens,
in ejus in Claravalle filium suscipi hu-
militer postulasti: sed ea conditione,
ne pro more tibi minimè probato Or-
dinis, in ultimas ignotasque terras e-
mittereris. Et ille quidem licèt Obedi-
entiam nullas pati condiciones affere-
ret, bono interim animo esse jussit; se-
curum te faciens, non alibi, quàm in
Claravalle moriturum. Quo accepto
promisso sinè cunctatione in illud iter
te cum eo conjecisti, gratissimus co-
mes; quòd illi ob utriusque linguæ pe-
ritiam pro interprete per Germaniam
servi-

servires. Verterat in furorem hæc tua pietas quendam è tuo famulitio: ac ut discessum tuum impediret, arrepto telo jamjam sternebat BERNARDUM: cum subito ultione Divina præventus, in terram supinus corruit. Quem ubi tam miserè extinctum, & verè perditum vidisti, tactus commiserationis affectu, ad sancti Abbatis pedes te abjiciens, supplex obtinuisti; ut magnus Thaumaturgus servo vitam, eumque dein sacræ militiæ redderet. Quam porro dignum te tanti Patris filium præstiteris; experta est ultra sexaginta annos Claravallis: quam tua sanctimonia, spiritu prophetico, aliisque divinæ gratiæ donis illustravisti. *Perrantem in Theodidactis libris & ego frequenter audio magnum Doctorem: cui utinam tam faciles ad obsequendum aures, ceu tu fecisti, præberem! Aufer à me cor contractum, durum, & aridum: vicissim impetra mihi cor dilatatum, apertum, & docile: ut aurea illa, & super mel dulcia monita nunquam sinè profectu legam.*

B. GALTERI, doctrina & pietate insigne S. Ordinis Caput. Qui de Abbacia Longi-Pontis ad supremam Præfecturam evectus, tanta florebas existimatione nominis; ut Honorius III. jam Pontificiâ tiarâ sublimis,

C 4

opus

Mortuus suscitatur.

Legas, ut agas.

Obijt hac die anno 1223.

opus Sermonum, à se elaboratum, tibi dicaverit: dixeritque non semel Legatum ad Gallia & Anglia Reges. In qua functione gravissimas controversias feliciter prudentia tua discussit. Eiusdem Honorij jussu, barbaris Livonia & Licaonia populis, præclaros ex Ordine Apostolos elegisti. Tandem deficientibus præsenio viribus, piè in tuo Cistercio diem ultimum clausisti.

Apostoli ex Cistercio.

Advocatus apud Deum.

Esto tu inter me, heu multarum noxarum gravissimè reum: ac inter Deum tremendum Judicem Legatus pacis; illumque mihi tua eloquenti interpellatione ad pacem, id est, ad parcendum, & misericorditer ignoscendum inflecte.

Vixit circa annum 1216.

Mens à vanisaversa.

B. BEATRIX, Spinosi Loci fundatrix. Quæ mundi delicias forti supra seculum animo calcans, Sponso Virginum te unà cum amplissima dote ita addixisti; ut & ille se, dotemque regni sui in jus tuum transcriberet. Nec tardior ille fuit in redamando; dum te in ipso ætatis flore in optatam hæreditatem introduxit. *Felix permutatio, ubi pro perituris immortalia; pro momentaneis bonis aeterna comparantur. Fac, ut & ego animum meum plenè avertam ab hujus exilij verè exilibus, & evanidis consolatiunculis, & toto mentis affectu quæram solida patriæ felicioris gaudia.*

S. B E R-

S. BERNARDUS, *serm. 5. de diversis.*
*Exeamus de terra nostra; ut non
 comprehendat nos cogitatio spectans
 ad voluptatem carnis. Exeamus &
 de cognatione nostra, id est à cogi-
 tationibus curiositatis: quæ nimirum
 cum in sensibus corporeis habitat; car-
 nali utiq; cognata est voluptati.*

Abnega-
tio sui.

(☉)(☽)(☉)(☽)(☉)(☽)(☉)(☽)

20 Januarij. 13 Cal. Febr.

B. THEODARDE, humilitate, atq;
 puritate tam mentis quàm corpo-
 ris incorrupta à DEO dotata: multis
 etiam è cælo revelationibus illustrate.
 Quas inter & illa fuit; dum aliquando
 ad mensam repente in fletum, statim-
 que in risum solutus, utriusque cau-
 sam dæmones fuisse retulisti: quos in
 raptu videris ad moribundum fratrem
 ingenti numero fremebundos accurre-
 re: ideòque te lachrymatum: at pul-
 satâ in signum orandi tabulâ, cum de-
 formes illas belluas conspexeris in
 fugam præcipites ruere; ita ut se invi-
 cem in januæ angustijs, porcorum in-
 star grunnientes opprimerent; risum
 te continere non valuisse. Sed & vitæ
 tuæ innocentia tibi pro scuto fuit, ne

Vixit
circa
annum
1200.

Dæmo-
nes ad
moribû
dû ac-
currüt:

fugiüt.

C 5 ex

ex belluis illis tartareis ulla tibi mori-
 enti molesta esse præsumeret. *Fuga*
nunc tuis pro me orationibus canes illos,
qui tanquam leones circumeunt, quaren-
tes, quem devorent. Si enim in quotidiano
nunc cum illis certamine frequentes victo-
rias reportaveris; spero, nec in ultima lu-
ta prævalituros.

Nunc
 pugna-
 dum

Floruit
 circa
 annum
 1610.

B. Pater MICHAEL Triquier,
 magne Doctor, & disciplinæ regularis
 restaurator zelosissime. Qui Parisijs
 laurea Doctoris coronatus; ac postmo-
 dum ad varia in S. Ordine munia ad-
 hibitus, strenuè & sanctè omnia admi-
 nistrasti. Denique in monasterio Fon-
 tis Danielis, tuæ stabilitatis loco, sta-
 bile, & in perpetua apud posteros me-
 moria duraturum sanctimonix tuæ
 monumentum posuisti: præcipuè in
 afflictationum sponte quæsitaram to-
 lerantia: dum totum corpus veste a-
 culeis ferratis aspera cinxisti, & ne pars
 aliqua dolore vacaret, sub capitis tegu-
 mento spinas, ad imitationem JESU
 Patientis, continuato dies noctesque
 cruciatu gestabas. *Infige etiã meo capiti*
spinarum aculeos, qui rebelles proprie
voluntatis affectus compungant & conte-
rant. Doce me in amaritudine animæ meæ
recogitare peccata mea; quæ nimirum acer-
biùs afflixerunt sacratissimum Servatoris
mei

Gestat
 spineã
 coronã.

Peccata
 spinã.

mei verticem, quàm spinis horrida corona.

S. BERNARDUS, *serm. de S. Andrea.*

CruX pretiosa est; & CruX amari potest; & CruX habet exultationem: si fuerit, qui colligat semper lignum Crucis, vitam germinat, fructificat jucunditatem, oleum letitiæ stillat, balsamum sudat temporalium charismatum. Non est arbor sylvestris; lignum vitæ est apprehendentibus eã.

CruX amada.

21 Januarij. 12 Cal. Febr.

B. B O S O, primis filijs, quos Christo *Ordinẽ*
 beatissimus Parens BERNARDUS *ingressº*
 genuit, feliciter annumerate. Verè *anno*
 lius pacis, & indolis mitissimæ: adeo *1124.*
 ut te motum aut turbatum nemo vi-
 derit unquam: sed eras ut inter pro-
 spera sic adversa tui ubique similis. O-
 tij persecutor acerrimus: in quod assi-
 duo vel labore vel prece pugnabas. *mortuº*
 Morientis facies tanto fulgore splen- *splēdet.*
 debat; ut astantibus evidenter con-
 staret; quam lucē inhabitaret spiritus,
 cujus communionem jam corpus gau-
 deret. *Dei oraculum est: beatos esse paci-*
 C 6 ficos

60 ANNI CISTERCIENSIS

ficos, quoniam filij Dei vocabuntur. Tu ora; ut qui Bernardum agnosco Patrem; & inter filios Dei me adscribendum spero; utriusque nominis veritatem factis implere studeam.

*Vixit
anno
1240.*

B. A G N E S, Sanctæ Julianæ Corneliensis germana: quam veluti pressis vestigijs in virtutum palestra sequebaris; omnium ejus ærumnarum & laborum in exilio particeps: ita eidem juncta es in gloria cœlesti. *Junge cum sorore tua sanctissima preces pro me, illis calamitatibus digno peccatore, quas vos in Angelica vestra innocentia pertulistis.*

*O Deus
hic ure!
&c.*

Rogate Patrem misericordiarum; ut pœnas peccatis meis debitas, dignetur in hæc vita infligere manu paternæ clementiæ; & ne reseruet mala mea in horribilem illum diem tremendi Judicij.

S. BERNARDUS, ser. 12. de divers.

*Miseri-
cordia
Dei
multi-
plex.*

Misericordiæ Domini multe. Quãdoq; enim ei, qui peccato quovis obligatus tenetur, piè immittit Dominus amaritudines quasdam, quæ mentem occupant hominis, & expellunt perniciosam delectationem peccati. Quandoq; subtrahit opportunitatem,
neq;

neq; tentari paritur infirmitatem. Quandoq; virtutem donat resistendi, quod majus est; ut scilicet tentationem sentiens, viriliter agat; & non consentiat.

☉)(☽)(☉)(☽)(☉)(☽)(☉)

22 Januarij. II Cal. Febr.

B. HENRICE, qui seriò perpendens; quòd in mundo dominari, nihil aliud sit, quàm splendida servitus; é contra servire DEO, idem sit, ac cum illo regnare: relicto amplissimo dominio de Berny, Conversorum habitum in Villario suscepisti; & humili obedientia, laborumq; assiduitate meruisti inter clara sanctè illius Eremitæ luminaria recenseri. *Utinam & ego duram servitutem, quam sub propriæ voluntatis tyrannide patior tandem aliquando plenè abjicerem! Tu Dominum majestatis exora; ut regnum, quod sibi in anima mea constituit, solò occupet, & ab omni alio dominatu misericorditer educat.*

Vixit
circ. a. n.
1200.

Deus
cordis
domin'

B. GUALTERE de Birbach, monache Hemmenrodensis. Qui ab incubulis singulari amoris ardore Matrem Deiparam colebas. Ac licèt te juveniliū annorum illecebræ, ad fectandam ex militari robore gloriam

Floruit
anno
1260.

C 7

vio-

*Pietas
singula
ris erga
Mariã,*

*& SS.
Missæ
sacrifi-
cium.*

*Aqua
in vinũ
muta-
tur.*

violenter attraherent; nunquam tamen exspirabat illa pietas; quin quotidie SACRO in MARIÆ honorem assisteres; illius Festa jejunio prævenires; largam stipem in egenos effunderes. Properabas aliquando cum socijs ad consuetos bellicæ artis ludos: At cum sese obtulisset occasio audiendi SACRI; relictis comitibus, tuæ devotioni indulgebas: Angelo intercæ personam tuam inter commilitones agente. Ut autem te sibi Clementiæ Mater arctius devinceret, Crucem auream per Sacerdotem, cujus sacrificio intererās, transmisit. Aliàs cum in ejus Festi pervigilio juxta consuetudinem pane solo & aqua victitares, allatam à famulo aquam bis in vinum convertit. Tot favoribus provocatum vehemens urgebat desiderium, te totum ejus obsequio mancipandi. Quod ut securius assequereris; audito, sacrum Ordinem Cisterciensem eidem sacratissimæ Virgini specialiter esse addictum, contemptis terrenis omnibus, cucullam monasticam in Hemmenrode induisti. Ubi cum plurima in te virtutum ornamenta relucerent; primas tulit innata pietas & veneratio MARIÆ: in qua alijs semper atque alijs modis colenda totus eras; & à qua nihil non impetrabas: præsertim

tim in dæmones imperium; quos fu-
 sa ad illam oratione, ab obsessis pro-
 fligasti sepius. Insidebat animo tuo
 mira charitas in sublevandis aliorum
 internis cordium morbis: quos ubi cę-
 litus cognovisti; ejusmodi languentes
 familiariter convenire solebas; & tan-
 quam tu illos conflictus patereris, hu-
 militer ab eis remedia petere; atque i-
 ta consilia salubria ingerere citra rubo-
 rem (qui plerunque salutis viam obstruit)
 ægrotantis. Rogatus à Priore, quibus-
 nam cogitationibus mentem occupa-
 res refectiois tempore; cum latinæ
 linguę rudis, mensę lectionem non in-
 telligeres: cui respondisti: versari tunc
 ob oculos tuos librum quendam præ-
 stantissimum; ejus paginis inscripta
 esse Divinæ Incarnationis & Passionis
 mysteria: haste percurrere in dies,
 necdum tamen totum absolvisse. Et
 haud exiguo pietatis sensu legisse te
 ostēdebant lachrymæ, quibus frequen-
 ter ad mensam madebas. Has denique
 abstersura Misericordiæ Mater, te per
 sanctum quendam senem de mortis
 vicinia præmonuit. Ac paucis inde e-
 lapsis diebus, tibi ex morbo decumbē-
 ti spectabilis adfuit; animamque egre-
 dientem ab exilio ad patriam deduxit.
 Sanctimoniam tuam famam perennem fece-
 runt

*Mira
 dexeri-
 tas in
 curan-
 dis ani-
 morum
 morbis.*

*Legit
 sub mē-
 sa sine
 libro.*

*Adest
 moribus
 do Ma-
 ria.*

64 ANNI CISTERCIENSIS

runt etiam vestimenta, quę in morbo-
rum remedium adhibita, præsentissi-
mani multis salutem attulerunt. Non
me latere potest, quot nominibus Magnę
cælitum Reginę sim obstrictus: hinc frigi-
dissima mea erga illam obsequia erubesco.
Tu tenuem, quam habeo, amoris venera-
bundi scintillam in magnum, & tanta
Virgine dignum incendium suscita. O fe-
lices flamas, si inter illas emori contingat!

Amor
erga
Deipa-
ram

S. BERNARDUS, hom. 2. sup. Miss.

In periculis, in angustijs, in rebus
dubijs; Mariam invoca, Mari-
am cogita. Ipsam sequens, non de-
vias; ipsam rogans, non desperas;
ipsam cogitans, non erras; ipsa te-
nente, non corruis; ipsa protegente,
non metuis; ipsa duce, non fatigaris;
ipsa propitia pervenis.

Fiducia
in Patro-
cinio
Marię.

(☩)(☩)(☩)(☩)(☩)(☩)(☩)

23 Januarij. 10 Cal. Febr.

Floruit
anno
1260.

B. BERNARDE, Comes Lippien-
sis. Qui educatis pijsimę in con-
jugio filijs, jugum Cisterciense, illo
priori suavius, suscepisti in Campo
MARIÆ: ibique Abbas electus, tam
vehementi zelo animarum, ad Christi
ovile

ovile adducendarum exarsisti: ut in ultimam usque Livoniam periculis & laboribus plenum iter susceperis. Ubi adeo fecunda spargebas Verbi divini femina; ut brevi numerus fidelium cōdendo Episcopatu suffecerit. Apostolica igitur auctoritate confirmatus, à proprio filio Othone, tunc Trajectensium Pastore, in Episcopum Lealhensem es inauguratus. Alium deinde filium Gerardum ambo vos, parens & frater, in Archiepiscopum Bremensem (raro, & vix à sæculis pari felicitatis exemplo) consecraftis. *O pie, & admirabilis Præsul! Esto mihi Bernardus; id est mellifluus patronus. Sim & ego unus ex filijs tuis. Consecra omnes actus meos, ut placeant Deo. Erudi me, ceu Livones tuos in sacrosanctis Fidei mysterijs: & gratiam impetra, sanctè in illorum confessione moriendi.*

Apostolus Livonie.

A filio parens consecratur Episcopus.

Fides.

Venerabilis GUIDO: qui ob probatissimam in Ordinis observantia vitam, Floridi-Campi Prior, indeq; Abbas electus; virtutes tuas magis, quàm te, altiùs esse evectas, opere demonstrasti. Illa verò promotio tua, quàm sibi grata, atque à se præordinata sit, cuidam sanctæ sceminæ revelavit DEUS: qui etiam te denique electione feliciori Electis suis in cœlo adscripsit.

Exora

Floruit circa annum 1191.

66 ANNI CISTERCIENSIS

Exora Divinam misericordiam, ut & me numerare dignetur inter Electos. Et quamquam reprobis me adjudicent peccata mea, me tamen in spem erigunt suavissima illa Christi verba; quibus in mundum se venisse dicit, non ut justos, sed peccatores vocaret.

Predestinatio

S. BERNARDUS, ser. 1. in Septuag.

Fiducia de predestinatione

Nescit homo, si sit dignus amore, an odio. [Eccl. 9.] Certitudinem utiq; non habemus: sed spei fiducia consolatur nos, ne dubitationis hujus anxietate penitus cruciemur... Itaq; qui stat, videat, ne cadat: & in ea forma, qua salutis indicium est, & argumentum predestinationis, perseveret, atq; proficiat.

(☩)(☩)(☩)(☩)(☩)(☩)(☩)

24 Januarij. 9 Cal. Febr.

Obijt
anno
1172.

B. FELIX Odulane, Geripontis in Hybernia monache: qui celestium rerum contemplationi tam feliciter eras addictus; ut orationi imperturbata & immobili attentione vacares. Passionum porrò inquietos motus ita castigationum severitate edomuiisti; ut vix senti-

sentires. Ad Episcopalem cathedrā vocatus, nō modò de consueta austeritate nihil relaxasti; sed eandem cum annorum simul & sanctimonix incremento auxisti. Ceterum fideli te ovium tuarum pastorem fuisse, vel mortuus ostendisti: dum illas nec tum deserens, prodigijs ad sepulchrum tuum juvisti.

Impetra tuis jam nulli mentis evagationi obnoxij; orationibus hoc mihi nobilissimum à Deo donum, vive attentionis inter precandum: comprime turbulentas passionū molestias, distractionum origines: ut (quod Regius Psalter optavit) dirigatur ad Deum sicut incensum oratio mea.

Devota
Oratio.

B. THEOBALDE, Cœnobij Eberbacensis Abbas; Qui ut eras pietatis fama clarus in paucis; ita abstinentiā prorsus admirabilis. Nauseabat nimirum anima, desiderio cœlestium epularum ebria, terrestres cibos; mox cum corpore in vermium nutrimentum transituros. *Excita & in me famem cibi, quo anima saginatur. Cibum suum ajebat Servator meus, esse, ut faciat voluntatem Patris sui: ita & mihi fac sapere cibum, quantumvis subinde minus lapidū, quem sacra Obedientia, quem penitentia, dignos à me identidem fructus exigens, apponit.*

Elect⁹
anno
1201.
Cibus
animæ.

S. BER-

Puritas
actionū

Verbum Divinum indicat, suum cibum esse, factum bonum; si tamen invenerit inter lilia; id est inter virtutes. Alioqui si extra repererit, & bonus (quod in se est) videretur cibus: non tanget illum, qui pascitur inter lilia.

(☉)(☉)(☉)(☉)(☉)(☉)

25 Januarij. 8 Cal. Febr.

Circa
annum
1217.

B. JOANNES de Jardin: qui in Eremo Villariensi præter alias virtutes magno studio rigidam corporis castigationem sectabaris. Altera tuæ pietatis occupatio fuit cultus Angustissimæ cælitum Reginæ; cum qua familiariter colloqui sæpe auditus es: sed tunc fiducialissimè, cum egressuram de corpore animam illius clementiæ commendaſti. Ab eadem piſſima Matre mihi impetra sanctum illud odium, quo te ipsum, & amorem sanctissimum, quo Mariam proſequebaris. Contraria sunt; sed in corde salutem suã amante, optimè conjunguntur.

Odium
fui, &
Amor
Mariæ.circa a-
1200.

B. CATHARINA, DEO singulariter devota sanctimonialis in Germania

nia

nia: Magnes Divini amoris: utpote
 quæ Sponsum cœlestem, quotiescunq;
 volebas, in terras traxisti. Reciproco
 autem amoris æstu, te ille sæpe per di-
 em septies extra te ad se rapiebat: quin *Raptus*
 aliquando viginti continuis diebus in *frequē-*
 extasi te detinuit: corpus intereâ, ne *tes.*
 deficeret, pascens divinâ ambrosiâ; a-
 nimum verò cœlestium gaudiorum
 prægustu. Porrò inter Angelorum a-
 gmina tam frequens versari visa es; ut
 dubitarent homines: tunc in cœlis, an
 tecum cœli habitarent in terris. Tan-
 dem hoc illis dubium beata morte sol-
 visti. *Septies in die ad sui amplexum te*
admisit Amor Divinus. Magna dignatio.
Sed heu quàm dissimilis tibi fuit hætenus
anima mea! Quam uinam septies tantum
ad se rapuisset vanitatum pestiferus amor!
Ah quàm erubesco nunc insipientiam meâ!
qua relicto & contempto Creatore, ausus
sum adherere creaturæ! Tu fac, ut vel
nunc tandem seriò ad Deum revertar: &
omnia desideria mea circumscribat versi-
culus ille Psalmi: Mihi adherere Deo bo-
num est, ponere in Domino Deo spem meam.

S. BERNARDUS, ser. II. de diversis.

Veni, Domine Jesu, atiam nunc: Je-
 su bone

Dolor
 de spre-
 to amo-
 re DEI.

Jugum peccati deploratur. *su bone, ejice iterum fortiter, quem nos insipienter admisimus: tunc enim verè liberi erimus; si nos liberaveris. Irritum fecimus fœdus primū; tibi peccavimus, Domine: satana & operibus ejus denuo obligantes nosmetipsos: jugo iniquitatis colla ultro submittentes, & subjicientes nos misera servituti.*

(☩)(☩)(☩)(☩)(☩)(☩)(☩)(☩)
26 Januarij. 7 Cal. Febr.

Obijt anno 1109. *Patien-
tia in opprobrijs.*

S. ALBERICE: qui ex eremita pijsimo, factus S. P. Roberti discipulus, Molismense cœnobium unā cum alijs viris sanctis construere cœpisti: ibique Prior constitutus, cū impellente zelo divini honoris, laxius viventes durius pro merito increpuiſſes; verbera, carceres, & opprobria patientiſſimè toleraſti. At cū omnē conatum in restauranda disciplina videres eſſe fruſtraneum; Molismo de licentia ſancti Abbatis diſcedens, in ſylva Cisterciensi tugurium ex arborum ramis juxta ſacram quandam ædiculam fabricaſti: adhibitis in alimentum obvijs, & ibidem ſponte naſcentibus herbis. Sed hæc frugalis menſa tam
vehe-

vehementem peperit orexim S. Roberto; ut & ipse relicto Molifmo, adjunctis sibi paris desiderij socijs, ad te convolaverit. Hic iterum novæ, sed sanctiori congregationi Prior præpositus; ac Roberto per Mandatum Sedis Apostolicæ Molifmum reverso, in Abbatem electus; gloriosum nomen, Conditoris Cistercij, si non primum, certè primum meruisti. Promovebant regendi felicitatem præter gratiæ superne affluentiam, idonea tanto molimini, naturæ munera. Eras enim ingenio mitis; eloquio dulcis; discretus zelo; aspectu venerabilis; in carnem tuam sanctè savus; in alios mirè benignus. Eminerat tamen inter virtutum tuarum insignia ardens in MARIAM DEI Parentem amoris affectus: quem à teneris unguiculis in pectore tuo alebas. Nec voluit illa Mater pulchræ dilectionis, se gratis amari. Cùm enim consuetas quadam nocte psalmodiæ laudes devotius cantares: adsuit illa in clarissima luce spectabilis: & candidam, quam manibus gestabat, Cucullam tuis humeris iniecit: in eundem colorem ex nigro mutatis omnium in choro psallentium cucullis. Non suppetebat, quod tanto favori in gratiarum actionem rependeres; quam ut pijsimi in eandem

*Roberto
succedit*

*Cultor
eximi
Mariæ.*

*Albam
ab ea
Cucul-
lam ac-
cipit.*

Ordo Ci-
stercie-
sis man-
cipatur
Marię.

eandem Roberti Patris exemplo, no-
viter in flores suos exurgentem Sacri
Ordinis Plantam illi in mancipatum
perpetuum consecraret. Nec respuit
illa donum: sed omnes Ordinis, per
totum brevè terrarum orbem dilatan-
di, alumnos in specialem clientelam
accepturam se, iisq; patrocínio suo ad-
futuram promisit. Hęc inter solatia,
viribus sub annorum laborumq; onere
deficientibus: dum illa Litaniarum
verba proferres: *S. Maria ora pro me: fa-
cie instar solis fulgente, animam Vir-
gineis MARIÆ manibus tradidisti.
Si adhuc inter nos peccatores viveres mor-
talis, non dubitarem te rogare, ut me An-
gelorum Regina, tantā benevolentia tibi
addictæ, commendares. At nunc in celo be-
atum majori fiducia accedo, orans, ut tuis
pro me ad illam precibus impetres; ne suo
me miserum patrocínio, in ultima præser-
tim cum morte lucta, destituat.*

Marię
patroci-
nium

Passę
circa
annum
1260.

Sanctę Virgines VITAVIEN-
SES, à Paganis in Suecia, pro Fidei &
Castitatis servandę constantia, crude-
liter trucidatę. *Excitate vestris me vul-
neribus ad patientiæ amorem. Monstrate
mihî frequenter speculum summę Patien-
tię, Jesum suis Vulneribus cruentum. In-
fligite cordi (quę corpus horret) vulnera:
elicitę pro sanguine saltem lachrymas.*

B. U L-

B. ULBOLDE, Veteris Monasterij Converse: qui divitiarum à majoribus acceptarum unum scripturus heredem DEUM, magna earum parte egenos locupletasti. Ex altera constructo Parthenone, tot filias nactus es, quot sacras DEO Virgines ibidem Cistercium educavit. Ultimam denique partem tecum ad cœnobium traduxisti. In quo avaritiâ melius tempori, quàm nummis impensâ, nihil magis dolebas; quàm jacturam vel levis momenti, quod absque utili labore, aut pia oratione transisset. *Æternitati nimirum te, tuâque omnia sacraveras: cuius memoria utinam me in omni actione nunquam desereret! Ad hanc enim metam si cogitatio mea collimet, vix fieri poterit, ut hoc brevissimum vitæ mortalis tempus non salubriter impendam.*

Circa
annum
1232

Æterni-
tas.

S. BERNARDUS, serm. ad schol.

Hoc tempus ad agendam pœnitenti-
am, ad acquirendam gratiam, ad
promerendam gloriam miseratio Cõ-
ditoris indulget: quo Divinam de-
bemus propitiare pietatem, & pro-
perare ad Angelicam societatem; su-
spirare ad amissam hereditatem, ex-
citare

Temp^o
hujus
vitæ ut
impen-
dendū?

D

citare

74 ANNI CISTERCIENSIS
citare remissam voluntatem, flere
admissam iniquitatem.

(96)(96)(96)(96)(96)(96)
27 Januarij. 6 Cal. Febr.

Obijt
anno
1227.

B. BRUNO, Monialium Parisiensi-
um ad S. Antonium Confessarie:
qui illarum spirituales profectum o-
mni diligentia promovisti, tum pieta-
tem excitantibus monitis, tum virtu-
tum variarum exemplis. Plures enim
noctes in oratione, & rerum cœlesti-
um contemplatione, quàm somno
transigebas. Præter hæc, stupenda, &
humanis viribus intolerabili inedia;
nec minùs acerbis flagellorum ac cili-
cij cruciatibus carnem affligebas. Jám-
que penè decrepitis, à Superioribus
facultatē obtinuisti, in Palestinam iter
instituendi: in quo perlustratis magno
pietatis fervore locis, quæ Christi pre-
tiosissimus Sanguis, ac pedum vestigia
nobiliteraverunt; contracto ex viarum
incommodis morbo, post suscepta ibi-
dem devotissimè Sacramenta, è terre-
na ad cœlestem Jerosolymam ascen-
disti. *Doce etiam me habitare in Jerusa-
lem, quæ est visio pacis. Videam in victo-
ria tentationum, pacem Conscientiæ: per
charitatem, cum proximo: per humilem
Obedientiam, cum Superioribus.*

Pax in-
terna.

B. D. O.

B. DOMINICE, cognomine Martine: qui cum in magnificentissimo illo Alcobatiæ monasterio per ætatem sapientia & gratia, apud DEUM & homines mirè profecisses; in Abbatem assumptus, numerosam illam congregationem tam piè prudentèrque gubernasti; ut post mortem, tanquam indubiè sanctus, Officio Ecclesiastico coli merueris: venerationis ac laudis materiam præbentibus, non ijs solùm; quæ in vivis sanctè gesseras; sed etiam quæ ad sepulchrum contigère prodigijs. *Ingeniis præconijs est, vel paucis sinè querela præesse. Quæ igitur tua laus, qui cætui nongentorum Monachorum in summa perfectione imperasti? Et quæ inertia mea, qui unum me tam malè rego, qui dum negotia regni caelestis, id est salutem animæ summo studio promovere deberem, cum ineptissimo illo Imperatore muscis inutiliù cogitationum capiendis, nobile tempus consumo?*

Floruit
anno
1253.

Negoti-
um re-
gni cœ-
lestis.

S. BERNARDUS, ser. 10. de diversis

Magna est, dico vobis, charissimi, & nimium inexcusabilis negligentia nostra, qui cogitationibus otiosis vacantes, tempus amittimus: quibus ni-

Cogita-
tionib⁹
otiosis
substi-

mirum nec penetranda nubes, nec
D 2 maria

tuenda
salu-
bres.

maria transfretanda, ut salubres inveniamus cogitationes: sed prope est (ut ait Moyses, Deut. 30.) Verbum in ore nostro, & in corde nostro; & infinitas in nobismetipsis utilium cogitationum occasiones & seminaria possumus invenire.

(☉)(☽)(☉)(☽)(☉)(☽)(☉)

28 Januarij. 5 Cal. Febr.

Cessit
anno
1211.

Colum-
ba insi-
det ca-
piti zy-
ronis.

B. CAROLE: qui non minùs avidè stemmatis & opum splendorem, jam suprà ætatem maturus adolescens contempstisti, quàm alij iisdem vanitatibus inhiant: id unum pro votorum meta constituens; ut in umbra Villariensis Asceterij latères. Sed ad publicam famam te statim initia produxere; miræ pulchritudinis columbâ capti tuo infidere visâ, dum sacro Ordinis habitu induebaris. Præsignabat nimirum columbinam animi puritatem, mentemque DEO plenam; quam deinceps non solum Villarium, sed & Magnates terræ non vulgariter venerabantur. Unde ibidem pro merito in Abbatem electus, non nisi cogente per Obedientiam Capitulo Generali assensum præbuiisti. Ita tamen in ea dignitate

tate præcellabas; ut cœnobium sub tuo regimine tam morum, quàm murorum decore, non exigua acceperit incrementa. Vir eras in diebus tuis potens opere & sermone: Principibus charus & honorabilis: inter quos sæpe aureâ tuâ facundiâ desperatam pacem sanxisti. Tam liberalis in pauperes, quàm parcus & durus tibi. Audiebas passim orphanorum Pater, & omnium afflictorum asylus. Impetratâ tandem multis precibus potestate, onus honoris, antecessorum pio more, deposuisti, ut tanto expeditiùs evolares in cœlum.

Eriam ego miser ingemisco sub gravi onere, à quo utinam me misericors Deus ante vitæ terminum exsolvat! Ponderus est, heu non dignitatis, quale tu sternendæ ad cœlum meæ abjecisti: sed indigna lucis opera tenebrarum: digna tenebris æternis peccata mea. Adjuva me, ut illa abiciam; & discussâ cæcitatæ meæ nocte, in serena vitæ melioris die, cursum meæ peregrinationis absolvam.

Onus peccatorum abjiciendū ante mortē.

B. RICHARDE: qui suave BERNARDI magisterium omnibus mundi delicijs antefereus, consuetos in illa virtutum palæstra sanctimonix gradus tam prosperè es affecutus: ut cùm ille virtutes suas in moribus tuis expressas conspiceret, celebri monasterio Val-

Obijt anno 1163.

Operā-
dum in
talētis.

cellensi Abbatem dederit. In quo munere talenta tibi à DEO commissa fideliter impendens; velut servus fidelis, & villicus utilis, introisti in gaudium Domini tui. Deprecare pro me Magnum illum Patrem familias; ut si quæ talenta mihi credere dignetur, donet simul gratiā, qua vivo semper proficiendi ardore in eis operer: non alium finem, quàm ejus gloriam; non aliud lucrum querens, quàm sanctissimæ voluntatis ejus in me adimplerionem.

S. BERNARDUS, ep. 253.

Profici-
endum
semper.

Nunquam Fustus arbitrabitur, se comprehendisse: nunquam dicit, satis est: semperq; esurit sititq; justitiam. Ita ut si semper viveret; semper, quantum in se est, justior esse contenderet; semper de bono in melius proficere, totis viribus conaretur.

(D̄)(D̄)(D̄)(D̄)(D̄)(D̄)(D̄)

29 Januarij. 4 Cal. Febr.

Circa
annum
1250.

B. REMBERTE: qui cum militiæ stipendia, quæ merebas, cum illis conferres, quæ sub Christi vexillo in virtutum arena certantibus promittuntur: atque illinc post laboriosas miserias, finem tristissimum: hinc post facilem

facilem pugnam, æternæ felicitatis palmas provideres: contemptâ, in qua maximè florebas, gloriâ mundique fastu, humilem Conversum in monasterio Villariensi induisti. Atq; ut in ista adhuc vita spem tuam non fore confundendam scires: aliquot ante obitum diebus, ipsemet sacræ militiæ dux humani generis Servator, unâ cum cælorum Imperatrice Virgine Matre, paratam tibi inter Beatos gloriæ sedem præostendit. *Ad militiam vocatur, quisquis ad vitam: nec cessat pugnandi necessitas, donec mors canat receptui. Te, ô beate, in hujus belli Socium invoco. Nosti fraudes & arma hostium: nosti & vires meas; utique succubituras, nisi alieno subsidio roboventur.*

B. H I M M A N A : quæ animum nobilissimo generi non imparem nacta, calcatis ab infantia mundi vanitatibus in monasterio Salsiniensi te inter Cistercienses Virgines Altissimo in humilem ancillam, castamque sponsam obtulisti. Crevere cum annis heroicæ virtutes: unde in Matrem electa, charitate indefessa, prudentia admirabili, & solitudine in singulas æquali, fortunatum regimen effecisti. Inter alia tuæ pietatis argumenta non ultimum fuit, amor & cultus erga Sanctorum

*Ostendi
tur mo-
rituro
calestis
gloria.*

*Auxiliū
in bello
spiritu-
ali.*

*Floruit
anno
1260.*

*Cultus
SS. Re-
liquia-
rum.*

Reliquias: quas cum pro voto à germano fratre Conrado Archiepiscopo Colonienſi acciperes; in diverſa illius viciniae loca multam devotionem induxiſti. Ut autem te Chriſti non glorioſi duntaxat, ſed & patientis ſponſam agnoſceres, ingens ærumnarum procella in te repente fuit effuſa. Cum enim Juſtitiae zelo ducta ex urbe Namurcenſi, ope illius Comitiffæ, infamis vitæ faciem hominum proſcripiſſes; à furioſis civibus è monaſterio ejecta,

*Patientia in
adverſis.*

in diuturni exilij moleſtijs uberem invenisti meſſem; ex qua dilecto tuo faſciculum myrrhæ componeres. Por-tum denique ex hoc naufragio dedit monaſterium Flinense: cui poſtquam aliquot annis præfuiſti: ibidem ſancto fine quievisti. Scio, *ſpinofam hanc patientiae ſylvam mihi non tam pro communi*

*Hic pa-
ti, levi⁹
eſt,
quàm
Ibi.*

generis humani ſorte, ſed maximè in peccatorum meorum ſupplicium, aut in hoc, aut in altero ſaeculo penetrandam. Tu ora, ut Deus corripiat me in hoc gratiarum & miſerationum ſuarum tempore: utque in diem illam tremendam nihil differat, niſi quod in miſericordia coronet.

S. BERNARDUS, ſerm. 17. in
psalm. XC.

*Non contemnamus, fratres, tribu-
latio-*

*lacionem: semen modicum est, magnus
exinde fructus exurgit. Fortè in-
pidum est, fortè acerbum, fortè gra-
num sinapis. Non consideremus, quæ
inveniuntur, sed quæ non inveniun-
tur in eo: quæ enim inveniuntur,
temporalia sunt; quæ non inveniun-
tur, aeterna.*

Tribu-
latio
quo ani-
mo fe-
renda.

(☉)(☽)(☉)(☽)(☉)(☽)(☉)

30 Januarij. 3 Cal. Febr.

B. ÆGIDI, cognomento Amice; *Floruit*
Abbas monasterij de Baudeloo. *circa*
Qui in vastissima illa tunc temporis e- *annum*
remo Angelicam vitam ducens, igno- *1230.*
tus esse mundo, tibi que mundum cu-
piebas. At sanctitatis tuæ fama, quasi
sonora quædam, & densi illius Luci
(id enim sonat Baudeloo) fragore au-
cta vox, ita per Belgium increbuit: ut
catervatim accurrentibus virtutum tu-
arum æmulatoribus, Cœnobium in
maximam amplitudinem excreverit.
Quæ quidem ultra tria sæcula immo-
bilis stetit: donec furibunda hæresis
veneranda illa antiquæ pietatis monu-
menta funditùs evertit. Sed Phœni-
cem nimirum genueras, qui è suis cine-
ribus redivivus, hac ætate in civitate

D 5

Ganda.

Beata
solitu-
do.

Gandavenſi novo ſplendore, tam diſciplinæ regularis quàm ædificiorum alas explicat. *Habitem & ego in ſolitudine cordis mei, procul à rebus omnibus, quæ ſunt mundi: cum mundus, ſi verè conſideretur, nihil ſit aliud: quàm malorum ſentina, animarum naufragium, viarum ſchola, & præceptum ad interitum via: viceverſa, beata ſolitudo (ut cuiſdam ſancto placuit) ſit ſola beatitudo.*

S. BERNARDUS, ſerm. 40. in Cant.

Solitu-
do ubi-
que in-
venitur

De cetero ſola indicitur tibi mentis, & ſpiritus ſolitudo. Solus es, ſi non communia cogites; ſi non affectes præſentia; ſi deſpicias, quod multi ſuſpiciunt; ſi ſaſtidias, quod multi deſiderant.

(—)(—)(—)(—)(—)(—)(—)

31 Januarij. Pridie Cal. Febr.

Vixit
anno
1529.

B. MARIA à Matre DEI: quæ Venerabilem Cisterciensē in Jепенſi monaſterio ſuſceptum, velut aurum ſuum, quo includitur, gemma, tuis virtutibus exornasti. Unde majoribus curis idonea, ad conſtruendum novum monaſterium in villa de Pinto prope Madridum emiſſa; illud glorioſo titulo Imma-

Immaculatæ Conceptionis MARIÆ
 dedicasti; & pluribus annis sanctissi-
 mē rexisti. Corpus tuum inviolatæ *Corpus*
 innocentiaē tenax, adhuc hodie in Je- *incor-*
 pensi Cœnobio servatur integrum si- *ruptū*
 nē ullo corruptionis indicio; sed nō si- *manet.*
 nē admiratione, & multiplici fructu
 ad tanti prodigij venerationem acce-
 dentis populi. *Corpus meum multa pec-*
catorum tabe corruptum ad ista solius in- *Anima*
nocentiaē præmia non aspirat: sed tu preti- *incor-*
osum aroma veræ Contritionis, ac amoris *rupta*
Dei mihi compara: quo melior illa pars, d- *optatur*
nima, acceptam ab origine sua incorrupti-
onem recuperet.

B. PETRE, Villariensis cœnobij *Floruit*
 Converse. Qui cū adhuc in sæculo *circa a.*
 morareris; levia quædam delicta ju- *1200.*
 ventutis tuæ in tanta amaritudine a-
 nimæ desitebas; ut ad misericordiam
 quoque superabundantem flexa Divi-
 na Bonitas; voce de cœlo emissa, pone-
 re mœrorem jussit; quandoquidem
 remissa tibi sint omnia peccata tua. De
 ulteriore porrò hujus favoris certitu-
 dine sollicitum, ac supplicem; Miseri-
 cordiæ Mater per visum ad cœlestem *Baptis-*
 Curiam deduxit: ubi post peractas cœ- *mum*
 remonias, quas salutari lavacro tin- *alterū*
 gendis infantibus adhibet Ecclesiæ pia *in celo*
 consuetudo: te iterum ab ulteriore *per vi-*
 planctu

*sum re-
cipit.*

*à Chri-
stoterū
robora-
tur.*

*sui pa-
tieni
cupit
confor-
mari.*

*dirè se
cruciat*

planctu dehortata est, & gratulata; quòd eandem Innocentiæ vestem receperis, quam tibi olim recens nato, verus ille Baptismus contulisset. Eâdem suadente, ut ad summum virtutis apicem pertingeres; Cisterciense Institutum in Villario es amplexus: ubi cùm prima illa lugendi materia defecet, novam suggestit fastidium miseri exilij, & desiderium patriæ felicis. Novo languori novum remedium præbuit inexhausta pietas Servatoris: qui te clara voce sic alloqui dignatus est. *Cur ploras, dilecte mi? Noli deficere, noli diffidere, noli metuere. Servi fideliter, profice jugiter, persevera fortiter: Ego adimplebo omnia vota cordis tui.* Innumeris ejusmodi gratiæ Divinæ donis confirmatus, totum te immeristi pelago supremi amoris; id est contemplationi & imitationi Dominicæ Passionis. Cui ut corpus tuum, quantum permittunt humanæ vires, conformè redderes; nulla doloris instrumenta intentata reliquisti: Cilicia, vepres, flagella, ut nimis vulgaria, pro ludo erant: unciis ferreis, veste ex erinacei pellibus texta, quadraginta dierum inediâ, non tam cruciare quàm laniare te; patienti sitim aliquatenus restinguebant; at minimè satiabant: donec clavis trabalibus

balibus manus ac pedes; ignitòque ferro latus perfoderis. Hic denuo divinus amor fervori tuo, supra seipsum pene eluctanti; metam posuit, sanatis non sine prodigio celerrimè plagis, vix relicta ad solam doloris memoriam cicatrice: apertum tamen usque ad vitæ finem conservasti pectoris vulnus. Grandi nimirum animæ spiraculum cordi vicinius atque patentius opus erat: per cuius hiatum ex carnis ergastulo elaberetur ad cœlum. Certè ne coalesceret, illud fune ex fetis equinis contorto tam diu obligasti: dum subtilissimo Divini amoris igne eliquatus spiritus, spirare desineret in corpore, fieretque unus cum DEO in æternitate. Quàm verò excelsum gloriæ cœlestis gradum fueris assecutus, ex eo licet conijcere: quòd cum Angelorum Regina te in quodã raptu admonuisset; ut diem Immaculatæ suæ Conceptioni sacram, etsi in Ordine nondum receptam, summa devotione obires: idque te, quoad vixeris, facturum promississes: ipsa novo vinculo spiritualis conjugij te sibi devinxit: nec dedignata est Sponsa Spiritûs sancti, se quoque tuam, licet humilis Conversi, Sponsam appellari. Resume ferrum illud ignium; transverbera hoc durum cor meum:

*Quinq;
Vuln-
ra sibi
infligit.*

*Vulneri
cordis
funem
immit-
tit.*

*Festum
Imacu-
late Co-
cept. ju-
betur
celebra-
re.*

ut vel sic sentiat amarissimos dolores, quos Unigenitus Dei Filius pro me ingratiſſimo peccatore ſuſtinuit. Per illum te amorem precor, qui pectori tuo inſedit, ne patere, ut ultra tanto amori vivam ingratus. Si ſaxum eſt cor meum: ſtylo ferreo inſcribe ſacra Dominice Paſſionis myſteria, ne obli- terentur. Si glacies eſt: igne tuo totum in aquam reſolve, ut illud per oculorum mea- tus effundam. Fac ut reſiduum annorum meorum ſit jugis meditatio Dolentis & A- mantis Jeſu: nec prius dolere & amare deſinam, quam vivere.

Medita-
tio Paſ-
ſionis
Domi-
nicæ

S. BERNARDUS, ſerm. 43. in Cant.

affidua. Tu quoq; ſi ſapis, imitaberis ſponſe prudentiam; atq; hunc myrrha tam charum fasciculum de principali tui pectoris nec ad horam patieris avelli: amara illa omnia, quæ pro te pertulit, ſemper in memoria retinens, & affi- dua meditatione revolvens; quo poſſis dicere & tu: Fasciculus myrrhae dile- ctus meus mihi, inter ubera mea com- morabitur.



ANNI